

業行盡，以善業力淨於結心悅，可佛意。是人惡道悉皆永盡。大王，此不思議光菩薩已曾值遇六十四億佛，恭敬供養，尊重讚歎。是諸佛所常修梵行，勤進求法。此本善力得如是事及神通力。大王，如是黑白之業終不敗亡。是故智者善護身口，及以意業，寧捨身命，不造惡業。爾時波斯匿王白言：世尊，彼賢天菩薩為已得成於一切智，為故修集菩薩行耶？

佛言：大王，彼賢天菩薩今者在彼阿閼佛土修菩薩行，名曰德藏。爾時波斯匿王白言：世尊，若善男子善女人，常應當親於善知識，近善知識，何以故？世尊，近善知識恭敬圍繞，聽聞善法，聞善法已得於善心，已有善心，則修善行，造作善業，趣向善處，得善知識，得善友，故不作諸惡，修習諸善，習諸善已，自無逼熱，不逼熱他。若有菩薩自護護他，能得菩提，若已住道，有大勢力，能有所利。佛言：善哉，大王，快說此言。大王，菩薩親近於善知識，具滿一切功德善法。爾時不思議光菩薩白言：世尊，言世尊，菩薩成就幾法，疾得阿耨多羅三藐三菩提，獲淨法忍？

佛言：嬰兒，菩薩成就四法，疾得無上正真之道。及淨法忍，何等四？解因緣忍，遠離斷常，解無我人眾生壽命，解了空寂，修行於空，是為四。復有四法，何等四？過去寂滅，未來無知，現在不住，三世平等，是為四。復有四法，所謂自淨，淨諸眾生，淨法，淨禪定，是為四。復有四法，謂寂身，寂心，寂道，寂法，是為四。復有四法，謂以法觀佛，不以色，以離觀法，不以我，以無為

觀，僧不以眾，淨於慧眼，是為四。復有四法，所謂滿足諸波羅蜜，不捨四攝法，善知方便，說無眾生而行大悲，是為四。嬰兒，是為菩薩成就四法，疾得阿耨多羅三藐三菩提及深法忍。說是法時，不思議光菩薩得無生法忍，歡喜踊躍，上昇虛空，高七多羅樹，時此三千大千世界六種震動，大光普照，天雨眾華，百千伎樂不鼓自鳴。

爾時世尊知不思議光菩薩心已，即便微笑。佛之常法，若微笑時，種種若干百千色光，從面門出，青黃赤白紅頗梨色，是光普照，遍於無量無邊世界，隱蔽魔宮及日月光，斷除地獄餓鬼，苦已上至梵世，還遶佛三匝，從頂相入。爾時大德阿難，從座而起，偏袒右肩，右膝著地，合掌向佛，說偈問曰：

色相甚微妙	雜好莊嚴身	圓光善答問
以何因緣笑	上戒行無畏	勝定慧莊嚴
示堅解脫果	以何因緣笑	忍力及十力
忍勇進難動	樂見示四諦	以何因緣笑
金剛身堅固	那羅延力盡	梵音聲悅意
願演說笑義	梵身天在上	不見如來頂
次第合掌敬	以何因緣笑	樹王下降魔
得無垢淨道	知諸眾生行	願顯何緣笑
轉無上法輪	說無常動地	調人天龍等
大德何故笑	照明除闇冥	無垢遍淨眼
功德如虛空	以何因緣笑	

爾時世尊告阿難言：汝今見是不思議光菩薩，去地七多羅樹，住虛空不。阿難白言：已見世尊，阿難，是不思議光菩薩，過百千阿僧祇

劫，當得作佛，亦號不思議光，出現於世。如來應正遍覺，明行足，善逝，世間解，無上士，調御丈夫，天人師，佛世尊，國名淨潔，劫名無咎，阿難，是淨潔佛土，甚為清淨，如此他化自在諸天宮殿，彼佛壽命二十中劫，大聲聞眾其數八萬，諸菩薩僧三萬二千，阿難，以何因緣故，劫名無咎，阿難，彼時多有百千劫中，無佛出世，是不思議光佛於彼劫中，最初成佛，淨居諸天歡喜讚歎，此劫無咎，此劫無咎，以有如來出現於世故，是故當名此劫無咎。說是不思議光菩薩時，三萬二千眾生發阿耨多羅三藐三菩提心，六萬菩薩得無生法忍，五百比丘斷諸結漏，心得自在，成阿羅漢。爾時佛告阿難：汝受此經持讀誦說，於大眾中廣敷演之，令我正法久住在世，亦多利益未來菩薩。大德阿難白言：世尊，我已受持世尊，此經何名？云何受持？佛言：阿難，此經名為除淨業障，亦名為神力所持，不思議光菩薩所說，如是受持，阿難，若善男子善女人，盡其壽命，奉諸如來供養恭敬，尊重讚歎，以雜色花，祴ヒナ如須彌，燒香末香塗香，幢幡寶蓋，皆亦如是以用供養，復有善男子善女人，受持於此，不思議光所說經法，讀誦通利，在大眾中廣為人說，如說修行，是福多彼，阿難，若欲法供供養如來，欲作大智慧光明者，應當受持讀誦此經。佛說是經已，不思議光菩薩，大德阿難，一切大眾，人天龍鬼乾闥婆阿修羅等，聞佛所說，皆大歡喜。

不思議光菩薩所說經

無所有菩薩經卷第一

No. 485

隋天竺三藏闍那崛多等譯

如是我聞。一時婆伽婆住王舍城毘富羅山中。與大比丘眾滿足百千人俱。復有百千諸菩薩眾。及比丘尼諸優婆塞及優婆夷。天龍夜叉乾闥婆緊那羅摩睺羅伽迦樓羅等。復有欲界諸天子。色界淨居諸天子等。圍遶在前而為說法。

爾時眾中有一菩薩名無所有。在彼會坐。然彼眾中有諸菩薩心懷疑惑。悔作惡者。住顛倒者。有業障者。有法障者。及諸眾生為障所障。不能問佛。然彼欲為彼等眾生淨業障。故欲問世尊。觀此諸眾多有菩薩欲悔先惡。而心焦惱不能聽法。復見菩薩心不悔惱能一心聽。觀彼心行多有苦惱。多有憂患多有穢雜。多生老死憂悲苦惱。多怨憎會多愛別離。當欲成就阿耨多羅三藐三菩提。而為如是等無量纏縛。云何當於阿僧祇劫行菩薩行。既自有縛。云何當能解眾生縛。爾時無所有菩薩如是念。已即自思惟。若世尊教聽我請問。為於此眾一切眾生。作惡疑悔令遠離。故爾時世尊知無所有菩薩摩訶薩。并及彼等諸菩薩眾心所念。已告無所有菩薩摩訶薩言。汝無所有。我亦不為諸菩薩說有染有著。有縛有繫有犯犯處。所以者何。一切著處。一切染處。一切縛處。一切障處。一切犯處。欲令超越遠離諸相。行不和合。諸法不雜。不可得。故證阿耨多羅三藐三菩提。如是一切諸法

不縛。諸法不染。諸法不著。不繫不障不犯不縛。是故當成一切種智。善男子。有一切智發心之處。不得眾生。於彼處中無法可縛可染。可著可繫可障。可犯可得。可知處所。汝無所有。汝應當為諸菩薩問。如諸菩薩摩訶薩等。不倦不污無著無縛無障。虛空離虛空。想無有障礙。於阿耨多羅三藐三菩提速成就。故於一切處當為開顯。

爾時無所有菩薩。既為如來教請加持。及己智力。於多佛所種善根。故能於般若波羅蜜中。無有疑惑。隱身不現。而無所著。欲為攝化諸菩薩。故而復欲顯諸福德。故復為著心諸眾生等。為取著覆行。在於相遠。善知識為惡知識之所攝取。諸菩薩輩。知一切法皆不可得。欲令無著。欲令覺故。即以無量種種名花。或水陸生。或金銀花。普散佛上。以精誠意歡喜。勝妙無有缺減。令諸眾生歡喜。故讚歎世尊。以偈問曰。菩薩遊何處。

何者是父母 住止於何處 何等為眷屬
爾時世尊即以偈頌報彼無所有菩薩言

勇猛空遊處 般若母佛父 佛塔為住處
諸菩薩眷屬 遊六波羅蜜 菩提心父母
三昧為住處 諸福為眷屬
爾時無所有菩薩。從佛世尊聞此偈。已歡喜隨順。復以偈頌問世尊曰。

善能說此言 一切智無礙 隨喜於此言
復問人中上 以何為因緣 用何方便智
觸證於何法 當覺知云何
爾時世尊以偈報彼無所有菩薩言

勇猛菩提緣 方便攝眾生 證諸法空已
智者覺菩提
爾時無所有菩薩聞此偈。已歡喜隨順。以偈稱讚。而復問曰。善能說此言。一切智無礙。隨喜於此言。復問人中上。何故不墮惡。大熾可畏處。捨一切惡處。速至於善處。爾時世尊。以偈報言。不造一切罪。是故捨惡處。恒常為法行。是故至善處。爾時無所有菩薩聞此偈。已隨喜稱讚。而復問曰。善說此語言。一切智無礙。隨喜於此言。復問人中上。云何彼多罪。無智處造作。一切能速滅。盡滅無遺餘。爾時世尊。復以偈頌報彼無所有菩薩言。

眾生求解脫 此等願菩提
菩提不得故 諸罪皆滅盡
爾時無所有菩薩聞此偈。已隨順歡喜。復以偈頌。而復問曰。善能說此言。一切智無礙。隨喜於此言。復問人中上。云何諸愛著。流轉煩惱苦。成就菩提時。皆盡無有餘。爾時世尊。以偈報言。

常樂我淨處 顛倒取虛空 如實真覺已
渴愛皆當盡 無我慢渴愛 取等如虛空
不住於內外 彼等無得處
爾時無所有菩薩隨喜此偈。而復稱讚。以偈問曰。

善能說此言 一切智無礙 隨喜於此言
復問人中上 當作何業已 彼種子云何
彼等多有財 恒常無有盡 復能施一切
捨施無慳悋 身肉財頭等 彼皆悉能捨

爾時世尊。以偈報彼無所有菩薩言。

爾時世尊聞此問已為無所有而為解釋復說偈言 恒常於三寶

供養不疲倦 若復斷世間 彼智者供養 所發菩提心 為樂眾生故 彼荷擔菩提

為他說受用 一切一切智 為與眾生說 是故彼有財 一切時無盡 作如是業已

種如是子已 一切所生處 福饒多有財 若麤若細食 飲已淨如法 若得新衣服

先他後自著 是故生生中 一切具足勝 不加用功力 而得無盡財 是故一切施

捨施無慳悋 身肉及與頭 彼等無不施 爾時無所有菩薩聞此偈已隨喜稱歎復以偈問

善說此語言 諸智具足體 隨喜於此言 復問人中上 云何離熱惱

身口及與意 云何有上色 無垢最清淨 爾時世尊復為敷演而說偈言

受齋戒無闕 常說空無缺 知一切皆空 忍諸打罵辱 身口及與意 是故無熱惱

當得最上色 一切眾生愛 略說一切善語中 一切諸問解釋中

彼等云何堅精進 於一切處不違背 彼云何得有諸乘 若在世間及出世

爾時世尊以偈報言 作事不怯弱 分別心行中 故精進及智 所生中常有

爾時無所有菩薩復以偈頌問世尊曰 善說此語言 諸智具足體 隨喜於此言

復問人中上 彼云何有智 世間中決定 彼云何有力 眾生無能伏 爾時世尊以偈報言

常問諸佛法 不誹謗諸法 求諸巧方便 故彼有上智 五種味常施 施眾生無畏

是故彼有力 眾生無能伏 爾時無所有菩薩以偈問曰 善說此語言 諸智具足體 隨喜於此言

復問人中上 彼云何勝色 於世間最上 云何得長壽 多百億數歲

爾時世尊以偈報言 若聞虛實過 不傳向他說 常讚歎三寶

名聞至十方 不惱諸眾生 不隨喜殺者 是故得長壽 多百億數歲

爾時無所有菩薩復以偈問於世尊曰 善說此語言 諸智具足體 隨喜於此言

復問人中上 云何得梵音 迦陵頻伽聲 若有得聞者 聞已得歡喜

爾時世尊以偈報言 說法時讚歎 無復毀訾言 不破壞和合

是故得上音 護四種口過 常說利益言 自過能發露 是故得上音 螺鼓等音聲

和合眾伎樂 供養諸佛已 是故得上音 爾時無所有菩薩以偈問曰

善說此語言 諸智具足體 隨喜於此言 復問人中上 云何彼身腹 而得於平正

所有諸眷屬 而得相隨順 爾時世尊以偈報言 不與不教他 應病施湯藥

善友及怨讎 平等於光明 於彼等心已 是故腹平正 所有眾生理 無有數量者

愛念如自身 是故腹平正 父母於一子

常起憐愍意 於眾生如是 故得腹平正 菩薩及父母 供養不疲倦 是故彼眷屬

常順如自身 世尊諸長宿 及有尊上者 若承事彼等 調柔心謙下 是故彼眷屬

隨順如自身 彼無有分別 一切平等心 以四攝攝他 能攝多眾生 是故彼眷屬

當得如自身 教行諸善利 於不思議 是故彼眷屬 隨順如自身 和合菩提心

於不思議 隨順如自身 隨順如自身 彼等無不捨 於諸眾生所 故彼眷屬等

隨順如自身 於諸眾生等 當共同一事 是故諸眾生 常共為眷屬 已所有愛物

能以施於他 不念失分別 是故多眷屬 爾時無所有復以偈頌問世尊曰

善說此語言 諸智具足體 隨喜於此言 復問人中上 云何彼念淨 當有趣無邊

云何彼樂法 亦不離正法 爾時世尊以偈報曰 樂法者為說

失法者令念 不惱於眾生 故彼正念行 爾時無所有菩薩復以偈問於世尊曰

善說此語言 諸智具足體 隨喜於此言 復問人中上 云何聞法已 常無有疑惑

若得五通已 云何當不失 爾時世尊以偈報言 令眾生無惑

最上佛法中 彼等聞無疑 當得不失通 爾時無所有菩薩復以偈頌問世尊曰

善說此語言 諸智具足體 隨喜於此言 復問人中上 云何諸菩薩 常在諸佛前 貪瞋一切種 亦不能降伏 云何生煩惱

依何而對治 復能有慚愧 生已能寂靜
爾時世尊以偈報言 恒常念諸佛

亦無有所念 不得於眾生 彼等言菩提
是故名菩薩 恒常在佛前 亦不壞煩惱

亦不離諸佛 猶如智慧人 仰觀上虛空
於中無身心 彼無有別處 何時彼智人

觀看上虛空 彼時無餘念 若身若心中
如是護菩提 彼於諸佛所 不動身心等

亦不遠諸佛 無物妄分別 發起欲等患
無物不分別 是故不可破 有念現前生

無念故無障 捨已無實故 覺已此等捨
爾時無所有菩薩復以偈頌問世尊曰

善說此語言 諸智具足體 隨喜於此言
復問人中上 何緣當化生 菩薩常有樂

諸佛說法時 生諸蓮花中
爾時世尊以偈報言

所有諸功德 生死中有樂 眾生於中生
教諸佛法中 所有波羅蜜 於中一切教

世間及出世 令覺一切法 一切諸法相
無相無持者 諸法如是住 於中教眾生

於空及無相 無生中亦然 世間無行處
於中教眾生 是故彼化生 菩薩常有樂

諸佛說法時 生諸蓮花中 如是修功德
菩薩不毀者 彼等不為難 諸樂不思議

修是功德已 無能毀菩薩 諸法中巧智
彼無所不知 於諸法自在 決定見無疑

為於眾生說 攝取眾生故
爾時無所有菩薩聞此偈已隨喜此言稱歎世

尊以偈問曰 善說此語言 諸智具足體

隨喜於此言 復問人中上 何緣婦人見
變身為丈夫 端正人慧見 眾生皆愛樂

爾時世尊以偈報言 所有婦人念
婦人攀緣處 婦人歌詠聲 於彼不共住

皆不喜見聞 不觸如毒器 遠離如毒蛇
常恐怖婦人 不觸於諸女 不勤受女身

教轉女身故 彼見成男身 如是行行已
正住於此行 是故婦人見 即變身為男

爾時無所有菩薩聞說此已隨喜此言復以
偈問 善說此語言 諸智具足體

隨喜於此言 復問人中上 何緣眾生見
能發菩提心 而得不退轉 乃至菩提座

爾時世尊以偈報言
不說於小處 唯說勝菩提 是故眾生見

即發菩提心 若少分所有 想行中眾苦
如實無有處 為諸眾生說

爾時無所有復以偈頌問世尊曰
善說此語言 諸智具足體 隨喜於此言

復問人中上 何緣見病者 於此發慈心
爾時世尊復以偈報

觀身是虛妄 於中無所著 此是世間藥
是故脫眾患 由此病者見 須與得除差

於彼起慈心 是故除諸患
爾時無所有菩薩復問世尊而說偈言

善說此語言 諸智具足體 隨喜於此言
復問人中上 何緣眾生見 所有諸飢渴

皆悉能除愈 飽滿身充悅
爾時世尊以偈報曰 常施多飲食

復為說上法 是故眾生見 飢虛自然滅

爾時無所有菩薩復問世尊以偈頌曰
善說此語言 諸智具足體 隨喜於此言

復問人中上 何緣能離著 斷滅及常等
彼於中邊中 亦復無依住

爾時世尊以偈報言 不攀緣分別
超越世語言 知諸法平等 彼得無染著

爾時無所有菩薩復以偈頌問世尊曰
善說此語言 諸智具足體 隨喜於此言

復問人中上 何緣見惡行 能縛此世間
捨一切諸趣 能淨業思報

爾時世尊以偈報曰 當近善知識
若發菩提心 是故離惡行 當淨於佛智

爾時無所有菩薩復以偈讚問世尊曰
善說此語言 諸智具足體 隨喜於此言

復問人中上 何緣想行智 一切皆無有
真實空法中 彼當得無疑 何緣得辯才

能分別諸句 知於眾生行 如是為說法
云何四輪中 常得於彼住 彼不墮八難

當得此閑處 當取何頭陀 當行何苦行
彼無有惡悔 又復無煩惱

爾時世尊以偈報曰 眾生著想行
說如陽焰義 覺空無我已 當解諸辯才

覺實最勝義 彼當離八難 當滿四種輪
菩薩善巧智 抖擻諸有得 不得上苦行

知自我空已 無復有疑悔 諸法如虛空
知已不著世 覺顛倒義已 當成佛菩提

爾時無所有菩薩隨喜此言復問世尊以偈
頌曰 善說此語言 諸智具足體

隨喜於此言 復問人中上 聞已到閑處

當無所可住 云何發菩提 而名為最上
爾時世尊復為解釋而說偈言

如是聞已發 發已而不住 彼上勝眾生
當行勝菩提 若行如是行 彼無處可住
當速覺菩提 如人上射箭 此是三行說
若當覺如實 如本性寂靜 彼不行菩提
若有為聲中 所說於世間 一切聲無故
當知不為實 無實中無發 行亦不可得
若能如是知 彼行菩提行 無行以行取
亦不淺開敷 無所覺知已 彼行不可得
爾時無所有菩薩以偈問曰 善說此語言
諸智具足體 隨喜於此言 復問人上上
何緣捨諸身 當無一切苦 平等到諸界
當捨壽命行 若復右脇臥 若結加趺坐
或復起立住 或復當合掌 說甚深法時
般若波羅蜜 一切諸佛法 不住寂諸法
或見成佛時 或讚歎諸法 所有說諸法
定意於彼聽 當捨故身體 後生新身體
從家至於家 生發菩提心 不迷調伏念
一念正住定 云何當捨命 當復現神通
為我解此問 無邊智聚者 於中略當知
如調伏所說 所有諸功德 無量不思議
一切勝具足 彼等當成就 教師為我說
如有實如相 若聞是功德 一切當供養
當護十善已 無疑於空法 具四種梵行
一切皆成就 不得於六根 及一切三界
一切得自在 所聞不生疑 所有有為法
當知皆如影 應當如是知 其影無有為
無有為無影 無說無分別 無思無言說

無慳無有施 無為無影中 無說無分別
無思無言中 無持戒破戒 無為無影中
無說無分別 無思無言中 無諍無忍
無為無影中 無說無分別 無思無言中
無懈無精進 無為無影中 無說無分別
無思無言中 無亂無禪定 無為無影中
無說無分別 無思無言中 無愚無智慧
於時無影已 更無有所見 彼無所見已
故言為無影 亦非無有眼 其眼淨無垢
彼中無有物 無物盲不見 清淨當無物
無名無清淨 如是淨眼者 清淨無所見
所有影無有 無有亦無有 其空於空中
於諸煩惱等 現無當亦無 若男若女二
今無當亦無 此等如虛空 無思無分別
若知如此者 彼無有所著 離諸身有住
當求諸佛法 如虛空無邊 彼無所可住
無住無攀緣 隨意去而去 如是摩訶薩
當覺此方便 不著於三界 當行菩提行
心及與身口 常行為眾生 不知體空虛
猶如壓油輪 彼等見行時 不得於邊際
令住不動法 無所有住處 數數見眾生
受諸苦惱時 於彼起悲心 當行菩提行
為諸眾生說 如實真相 汝等離有為
應覺於真實 顛倒無智故 無牢起牢思
無牢身體中 愚癡等味著 此身常日別
以飲食買贖 彼不為自他 虛妄受疲倦
常與受樂時 亦無念恩德 無思念羸弱
宜應速捨去 生死中受苦 處所無有邊
今亦不可得 當亦不可得 生死中多飲

處所無有邊 今亦不可得 當亦不可得
生死受戲樂 處所無有邊 今亦不可得
當亦不可得 生死多受喜 處所無有邊
今亦不可得 當亦不可得 承事此身已
處所無有邊 今亦不可得 當亦不可得
生死流轉中 處所無有邊 今亦不可得
當亦不可得 生死中多睡 處所無有邊
今亦不可得 當亦不可得 令此身受樂
處所無有邊 今亦不可得 當亦不可得
令此身受苦 處所無有邊 今亦不可得
當亦不可得 養育於此身 處所無有邊
今亦不可得 當亦不可得 此身起我所
處所無有邊 今亦不可得 當亦不可得
受欲等流轉 處所無有邊 今亦不可得
當亦不可得 如無實無物 顛倒常欺誑
癡惑諸有為 如是誑癡世 猶如癡小兒
為他所欺誑 如是愚無智 以虛事所誑
無實誑愚蒙 不知無實故 當受虛妄苦
癡意起毒想 自然於自身 自然自合苦
猶如惡行故 後自受形首 心思已出言
身作非善事 其思無所有 言說亦無事
其聲無過去 過去亦復無 過去我何說
亦無有實相 若有如是知 身心如是觸
彼即戒行具 不生諸惡道 此等四種偈
舊作十億數 往昔別生中 求勝菩提故
我聞此等偈 未曾墮惡道 當逢事諸佛
無量人中雄 我過去次第 值遇然燈佛
彼時觸如是 於後我得記 我為眾生說
於後住佛智 我無所可取 愚癡不受教

①受(無)空(當)聖(愛)正(觀) ②眾生以色身為我,而常為業識所誑,如此經言極為真切

嗚呼眾生鈍 盲冥癡無智 能盡苦因緣
授之不肯欲 無智不肯取 樂小法眾生
不取於大法 若得世間樂 及解脫世間
常生世間眼 授彼而不取 得聞於此偈
若如是住已 於世無分別 我於世間中
寂靜無所著 當脫一切苦 而得不動樂

爾時眾中有不調伏怨仇害人者，在彼眾中從坐而起，偏袒右邊整衣服已，作如是念，當以何事供養世尊，其世尊者具足法身，不可少物而用供養，如是大德具足法身，然我今者，於世間中先有暗障，今見世尊，及無所有菩薩所問，世尊解釋得聞法要，我已得於一切法中無有障礙，已滅黑暗照曜世間，我今自見已生天眼，已得五通，我今已得脫諸苦惱，我見自身所著衣服皆有血汚，我於今者若以此衣覆世尊上，唯恐不任如來所受，願佛威神令我更得勝物奉施供養世尊，當用奉事如是最勝大德法身，如此眾生具足難有，是惡心難調，怨仇害人者，起如是願，欲信入佛如來大德神通，念時彼左手中自然有一篋天花，柔軟潤澤過於諸天，眾香自燒於右手中，上衣下衣自然而生，歡喜踊躍遍滿其身，更於諸佛大德神通更求信入，彼時即見十方無量世界諸佛皆放光明，爾時彼復作如是念，嗚呼諸佛不可思議，大德神通不可稱量，無有等等，願諸眾生信佛大德，自身觸已皆得行願，即以上衣及以下衣而覆佛上，以彼天花如是再三散於佛上，於虛空中莖上葉下而成花蓋，然彼復生第二花篋

亦生第二上衣下衣，彼復歡喜，踊躍無量，遍滿其身，即作是念，若佛聽我，以此花散此無量佛，及以此等上衣下衣覆諸佛上，願我生信，諸佛世尊願勿令我當有悔意，而不成施，則聞空中如是聲音，汝善男子，汝應普散此諸如來善男子，一切諸佛同一法身，諸佛世尊於諸法中，於諸物中無嫉妬意，善男子，諸佛世尊受用果報，於諸物中不染著故，彼作是念，今者世尊已聽許我，即以諸花及上下衣遙散無量諸佛世尊，見彼花衣於諸佛上，在虛空中作蓋而住，及見彼衣在諸佛前，即生愛樂歡喜踊躍，四支投地，禮世尊足，舐世尊足而為頂禮，彼復見身頂禮諸佛及釋迦牟尼佛時，彼諸世尊及釋迦牟尼佛，皆以右手摩其頭，言起善男子，汝今已生無量福聚，彼則起已，唯見釋迦牟尼如來，彼則問言，世尊，彼等無量諸佛世尊，今何所在，我不復見，佛言善男子，此是諸佛大德法身，具足無所得故，汝今應信，彼作是念，嗚呼諸佛不可思議，有如是色見大法體，頂禮佛足，右邊三匝，在一面住，合掌向佛，白言世尊，我是惡心難調，怨仇殺害人者，唯然世尊，如我先作令此眾知，世尊，我為此眾生等故，如是說，此等聞已，當起厭離，如是等惡，如先所有毒害嚴熾，若諸眾生，有見我時，恐怖馳走，世尊，我於今朝，取合死者十丈夫，殺嚙壞彼項，即飲彼血，世尊，我時以人血醉，惡心更增，更求害人，然我求時在王舍城，漸漸遊行至東北分，于時我見王舍城中有多人眾遊行在路，我則背

面在遠而住，恐彼見我生怖迴還，世尊，時彼人眾出王舍城，皆共往詣毘富羅山，到已上山，我時復見多有俱致，那由他百千諸天，遍滿不得邊際，世尊，我於彼時不見有一能於世尊功德光明，眾相諸色，形貌長短，若寬廣等能有勝者，世尊，我自見身最為卑賤，我於爾時即於自身生穢惡想，生輕弱想，不如物想，我於爾時毀辱自身，我今無利，我今惡活，我於如是多人眾中，最為下賤，最為穢惡，最為不如，最為嚴熾，世尊，我於爾時厭惡自身，如是羞愧，若此大地容受我者，即便入中，唯然世尊，我於爾時則聞空中如是聲音，汝善男子，但信諸佛大德法身，汝當得離此下類身，我於爾時如是思惟，正念根中念於諸佛大德法身，如是念時，復聞虛空如是聲音，善男子，汝當莫瞬諦觀世尊，汝觀察時即當得入諸佛體中，當信當得，世尊，我於彼時合掌不瞬瞻仰世尊，即見世尊諸毛孔中出大蓮花，眾寶所成，有無量色，金色無邊色，諸蓮花等大如車輪，從身中出，彼花臺中皆有諸佛，如釋迦如來，諸相具足，皆於中坐，遍滿虛空，無有眾生能障礙者，於日光明亦無能障，世尊，我於彼時即生最勝歡喜踊躍，此是諸佛神通之力，我於彼時生清淨已，見佛世尊，如是觀時，即見所有諸世界中，無佛出處，即住彼間而為說法，攝諸菩薩，無著無作，無有熱惱，空無所有，無言無說，無有所住，于彼時中，多有俱致，那由他等百千眾生發菩提心，離顛倒法，信無言空，於多億劫住菩提中，我如

是知亦不知晝亦不知夜不知半月一月年節。我如是知於彼時中我聞般若波羅蜜法無染著處無言無說我於彼時聞如是法所有法相無有染著無有言說聞是法已不見自身無知無得亦無處所當於彼時有如來像出現我前於彼時間即自見身及見諸佛還復來入於世尊身不見世尊身不見世尊身有增減不見世尊住處有明暗佛告彼言汝善男子此是彼等諸佛如來大神通力彼難調者而白佛言唯然世尊我今於佛大神通力更無有疑我無疑故見於無量諸菩薩等身皆金色有三十二大人之相持諸音樂種種香花甚可悅樂禮拜世尊奉獻供養以彼躍遍滿其身即自稱歎欣慶而去世尊我於彼時作如是念此是諸佛神通之力無有眾生得邊際者我於彼時還入思惟諸佛神通思求此時見此聽眾比丘比丘尼優婆塞優婆夷天龍夜叉乾闥婆阿修羅緊那羅摩睺羅伽等一切大眾而說偈言 無比知寂已處所無染著 當脫一切苦 而得不動樂 無所有菩薩經卷第一

無所有菩薩經卷第一

隋天竺三藏闍那崛多等譯

世尊我於彼時復見彼諸聽法大眾以天人花及眾寶物而散佛上及諸菩薩而聽法已復更出生種種音樂雜色衣服供養世尊以

諸衣服覆世尊上還坐本處而共聽法世尊我於彼時復作是念嗚呼諸佛神通無礙思惟信入隨順而行世尊我聞此說無礙法聲即入覺知而說偈言 我覺寂靜時 無有障礙處 即脫一切苦 而得不動樂

世尊我於彼時復於空中見如來身聞說是言汝善男子汝莫捨意汝應更信諸佛神通勤求信入汝善男子汝於長夜無智愚癡恒為欺誑受苦惱故世尊我於彼時間是語已復生恐怖身毛皆豎一心思惟求佛神通我思惟時即見三千大千世界所有草木樹林花果皆悉開敷好色香潔甚可愛樂世間天人阿修羅等以花散佛而供養已還沒不現復有諸果香潔無比復見世尊左手執鉢以取諸果滿於鉢中又見世尊於臍中出諸化菩薩從於鉢中而取果已遍至十方阿僧祇等諸世界中授與無量諸佛世尊彼世尊鉢皆悉盈滿我見彼佛世尊食時臍中復出諸化菩薩身皆金色眾相莊嚴從身出已我復見彼諸世界中諸菩薩及諸眾生以彼諸果奉獻供養既奉獻已見彼食時彼等食已皆悉得成如來形相至餘世界無佛之處於彼演說般若波羅蜜法要教化成熟無量眾生住於菩提諸佛法中勤修不斷為說法故鉢出已供養一切世間眾生充潤自身皆至佛所頂禮佛足右繞三匝合掌恭敬却住一面從世尊所聞無所有解釋法相一心聽受更無所見更無有智世尊我亦如是聽入隨

順如所說行我如是知我身與佛及此大眾空無可說如是念時有一佛像起語我言汝善男子此是諸佛大神通我於彼時所得諸想我想不行亦無歡喜亦不怯弱我唯信入諸佛神通如是思惟願諸眾生未入者入未度者度我發是心願諸眾生於佛神通圓滿無缺我時亦復無眾生想然我於佛大神通不可破壞為諸眾生及此大眾令成熟故作如是言嗚呼諸佛大神通如是希有我今乃見然佛神通亦無增減彼時復見空中有佛作如是言汝善男子更求信入諸佛神通世尊我於彼時一心信入諸佛神通一心念時即見諸佛神通力故一切眾生即一眾生一眾生即一切眾生然彼一切我亦不見世尊我於彼時作如是念諸佛神通不可思議如我見佛大神通等我於彼時更求諸佛大神通亦無厭足我求彼時更轉信入更復專念思惟觸證令增廣故世尊我於彼時見此三千大千世界四方所有毘富羅山佛及四眾天人修羅諸世界等皆成大海清淨無濁更無餘相世尊我於彼時復作是念嗚呼諸佛神通如是世尊我念佛神通時即見世尊坐彼水中而水不著我復見有菴摩羅果及菩提果無所缺壞繞佛三匝住在佛前佛為說法復說諸佛大神通等為說法時成菩薩形頂禮佛已即沒不現復見世尊在毘富羅山為眾說法如是略說乃至成火又成螢火又復成風大毘羅果是則成地如大母指一切世間即一世間一世間即一切世間

彼諸世間復成無智彼則真體我於彼時於
 佛神通如是觸證思惟是已不生疑惑亦不
 恐怖心慮不行爾時有一如來形像在我前
 住而謂我言汝善男子於幾時行六波羅蜜
 而能信此佛大神通廣思惟證世尊我於彼
 時白彼佛言如所言六波羅蜜者為是何謂
 彼告我言所謂檀波羅蜜尸波羅蜜羸提波
 羅蜜毘梨耶波羅蜜禪波羅蜜般若波羅蜜
 汝善男子如是名為六波羅蜜行已當得證
 入諸佛大神通中汝已成佛大神通已我時
 白言是故世間諸天及人阿修羅等聽我今
 說現今世尊為我證明於諸法中得無礙智
 世尊現知如我今說我未曾行六波羅蜜而
 得證於佛大神通我今始聞六波羅蜜我本
 前際墮黑闇中不可得知今見世尊及無所
 有菩薩所問世尊解釋我既聞已於諸法中
 無復黑闇於諸陰聚分別法中得無所著而
 說偈言
 我得寂靜智

無復有所著 今已脫諸苦 現得不動樂
 寂靜無比智 寂無有所寂 為何事布施
 多百爾所劫 我無布施行 已證無比寂
 布施中何作 彼施不為寂 寂靜無比智
 寂無有寂處 為何事持戒 多百爾所劫
 我今不持戒 已證無比寂 寂中無持戒
 戒亦不為寂 已知無比寂 所寂無寂處
 為何事修忍 多百爾所劫 我今不修忍
 已證無比寂 寂中何所忍 忍亦不為寂
 已知無比寂 所寂無寂處 為何而精進
 多百爾所劫 我不行精進 已證無比寂

寂中用進為 寂滅無精進 已知無比寂
 所寂無寂處 為何而修禪 多百爾所劫
 我今不修禪 已證無比寂 於中用禪為
 寂中無禪定 已知無比寂 所寂無寂處
 為何修智慧 多百爾所劫 我未修智慧
 已知無比寂 於中用智為 寂中無智慧
 何用施戒忍 精進及禪定 智慧等諸度
 何用多所行 我以無智故 已知寂無比
 於中智何作 寂中無用智 願為我解釋
 所有諸法中 一切智自在 尊無不知者
 彼問此義已 兩足尊為釋 如實真如等
 不散亦不合 不取亦不捨 汝今應當知
 於中及自他 當更無有疑 知佛神通已
 則離於我想 亦復無言說 自身捨無上
 覺佛神通已 一切罪皆滅 滅已無熱惱
 故名持戒者 聞佛神通已 彼言大神通
 如實無思慮 彼名忍辱者 覺佛神通已
 彼心無怯弱 更復生精進 故名精進者
 覺佛神通已 彼心不散亂 捨一切諸相
 故名禪定者 覺佛神通已 彼不著三界
 越超諸障礙 故名智度者 是行一切處
 諸度調伏者 覺知一切佛 是名佛神通
 爾時惡心難調害人者白佛言世尊一一諸
 佛法教難覺微少智者更深思惟而說偈言
 若有聞觸證 云何覺神通 彼當能滿足
 是等諸六度 及助菩提法 何謂佛神通
 有何實體相 彼有何色住 云何而得證
 爾時世尊以偈報彼惡心難調害人者言
 若有自覺知 自己無眾生 一切法中智

彼是佛神通 眾生有著心 教於空法中
 如是教眾生 當得佛神通 眾生有著心
 當一心普覺 亦不當發心 此是佛神通
 所有諸佛刹 即知一佛刹 彼此不相入
 此是佛神通 知諸法不生 能發菩提心
 諸眾生一生 故言佛神通 忍心為神通
 忍法體亦盡 入於一切法 亦無有所住
 彼住佛神通 一切法無疑 無疑無生法
 故彼得授記 成熟眾生故 當清淨佛刹
 於多劫修行 當得佛智故 覺知諸佛空
 一切最為上 度佛法彼岸 成熟眾生故
 佛聲及神通 文義皆能證 於祕密教中
 即得度彼岸 無邊不可取 亦無遍知者
 如是佛神通 無復有邊際 若自此證已
 即是勝布施 一切施中上 更不生惡處
 能行一切施 彼常行施時 無有分別知
 亦無有所住 覺知是教已 彼無物不捨
 於一切生中 是故捨一切 若聞此法已
 能捨於我想 取已無所著 是為最上檀
 聞已無熱惱 身心得寂靜 是為最上戒
 更無有勝者 於一空法中 無忍無諍競
 是為最勝忍 於中無上者 知諸法空已
 無有怯弱心 是為勝精進 於中無過者
 於空常不亂 一切心發覺 此是快禪定
 唯聲中示現 若於空不怖 一切智無想
 離睡眠無知 是智為最上 是等諸度行
 入於是教中 若知無言說 彼即知正法
 不壞於諸法 亦無有逼惱 彼即知正法
 無功用智定 不壞於諸法 亦無有逼迫

無知寂靜故 度於施彼岸 若不壞諸法
亦不逼諸法 此是最勝戒 一切戒中上
若不破壞物 於非法亦然 如是無疑已
更不墮惡道 若忍無盡故 覺一切有為
此是最勝忍 斷一切鬪諍 常習近是忍
晝夜不休息 如是身觸證 當得可喜色
若修習空時 不生勞倦意 是即上精進
捨一切懈怠 如是彼精進 若能身觸已
即名上精進 一切無過者 不著於空法
及與禪寂滅 此是最勝空 遠離諸覺觀
是中禪喜者 彼捨諸煩惱 如是身觸已
即無有輕躁 若於內外法 無所有依著
此是最勝智 無有智能散 當觀一切法
若無有智處 如是觸知已 不染著諸世
如是如實知 常能一切施 亦無一切施
彼無有所取 諸法無所有 即是諸法體
彼無所觸已 名為財富者 若思能清涼
善修於平等 無有諸怯弱 斷疑遍普照
清淨住戒中 彼無有熱惱 若無有所證
彼戒無所縛 解脫如虛空 更無有所見
如虛空清淨 故彼無惡作 無所見諸法
而求無上道 為諸眾生故 所起煩惱處
不見彼彼身 不見彼身時 煩惱無縛處
解脫皆如夢 更無所復見 彼無亦不見
是故名如夢 如是諸言說 有無等差別
聲覺觀分別 如空不可取 持戒與破戒
善趣及惡趣 癡虛妄分別 是處無真實
猶如鏡中像 分別故見彼 於彼無所有
色體實如是 如是內計我 士夫不可得

內既無所有 外亦不可得 此是如如教
是故言為空 若能知空者 彼當證寂滅
色從因緣生 彼色無實體 若緣彼無有
彼無無有因 無因故不生 本性空寂靜
無取亦無捨 無棄亦無似 若證是無二
一切根能忍 若得如是忍 彼當速成佛
我如是知已 得見然燈佛 於後授我記
汝往當成佛 若有善男子 及以善女人
彼覺如是等 則亦當不難 若有善女人
欲轉於女身 應如是知身 即得具足願
好色甚端正 見者生歡喜 丈夫富伽羅
覺知如是教 正行正念者 聞持已能思
名智慧丈夫 為眾決疑網 若有多眾生
疑惑無定意 欲求於智慧 彼能為斷疑
若住不正道 令彼住正路 幽冥諸眾生
能為彼照明 所有受生處 一切處得明
為眾生愛樂 覺知此教故 壽命得長遠
諸根悉具足 常生勝族姓 眷屬皆隨順
隨何等生處 為一切利益 并餘眾生等
悉令住菩提 若聞是等法 能速自證見
諸眾生應當 常恭敬奉事 應當作福田
堪受一切施 常為善丈夫 為世間支提
住於諸佛前 於一切勝施 無上世尊邊
彼等堪施主 降伏諸世間 當為作福田
若聞如是法 能勤修速證 一切諸佛教
此修多羅說 如是覺菩提 如如無分別
為此益法教 當行菩提行 阿僧祇劫數
聞是教法故 若於人天中 欲受諸果報
而能聞是法 應勤修速證 彼無能降伏

調御諸眾生 能於諸餘眾 彼恒有威德
彼智善得利 善得於壽命 得值佛出世
能聞此教故 所有諸佛法 彼知不思議
彼為作聲聞 復得僧功德 捨於一切法
復捨內自身 應聽修多羅 聞已應覺知
此法無不說 是處無所說 如是等諸法
此中如是說 不取亦不捨 亦無有得失
無處可持來 是法無住處 所有過去佛
彼如是說法 若有當來佛 彼當如是說
於十方世界 現在兩足尊 彼所說法教
亦如是無二 若有眾生欲 能說是法者
當如我所說 如是當覺知 若不覺此法
而當得涅槃 終不能觸證 及當住菩提
此彼皆具足 此是諸佛見 所有如是法
及如是見處 眾生界求時 難得於出現
若覺此諸法 真實體空寂 諸法無有實
諸法亦無有 若無有法想 一切有寂靜
此彼如實知 諸法無得處 無所有所問
無所有所說 時彼摩訶薩 名曰無所有
以念於如來 復問人中上 所說如是法
不可見而說 誰能覺如是 不可覺知者
是等多億天 及諸四部眾 合十指爪掌
寂意而聽聞 彼聞已欣慶 而無有所得
無智及得處 多眾住是意 若有未知者
彼等起欲樂 發勤精進意 當得聞已知
如是聞真義 真智無分別 如己無不如
真復如是說 聞諸佛妙法 所見大神通
皆發歡喜意 當得上菩提 多有俱致天
及百那由他 已覺自證知 如我之所說

今我此眾生 所有聞法者 倍有百千數
 已觸證真法 皆已共和合 昔恒沙佛所
 已聞覺是法 彼聞今觸證 彼此當作佛
 如我今所在 當如是說法 無有於增減
 是殺害人者 於往昔生處 曾聞如是法
 昔所未曾有 彼於今得聞 無所有解釋
 已入佛神通 今知於聞義 見是等大眾
 即厭於自身 自見最下類 知佛神通故
 復更信深入 不可思議等 彼入已即得
 非法非非法 此是佛神通 諸世間無上
 覺無分別已 無所無不得 此害人利根
 如所聞聞已 利根向我說 諸佛之法體
 眾生心頑鈍 為癡網所覆 雖復多時間
 不知佛神通 我昔曾見佛 證作人中上
 覺是大神通 於後得授記 過去八十四
 阿僧祇劫中 我值然燈佛 以知有為法
 以有所得故 為得之所覆 而著於我想
 為諸煩惱惑 不覺佛神通 以有於執著
 流轉生死中 數不得邊際 自餘若不覺
 如是佛神通 菩薩摩訶薩 彼著亦多時
 是諸菩薩等 欲速證菩提 寂靜佛神通
 應速願覺入 如是難調伏 名為害人者
 還得利智根 故彼得不難

爾時眾中無煩天子。即以諸天曼陀羅花而散佛上。合掌恭敬而白佛言。世尊。以何因緣是惡心難調殺害人者。如是利根智慧微妙。乃能如是速疾決了。說是語已。爾時佛告無煩天子言。天子諦聽。是惡心難調殺害人者。於過去世曾五百生。受毒蛇身。見即害物。受

彼身已。於日夜中多有眾生為彼所害。以飢惱故。皆食彼盡。猶不能足。食已消滅。皆成灰燼。彼以求食不得。眠睡身不安隱。惡心更增。或經日夜半月一月。或經年歲。因惡心故而取命終。即便墮於阿鼻地獄。生彼處已。受大苦惱。百千俱致。那由他歲。若捨彼身。還復生於見毒蛇中。如是次第。經五百世。常當受於見毒蛇身。若捨彼身。還復生於阿鼻地獄。以彼惡集。如是起故。於最後生。彼毒蛇母愛所縛。故殺若干虫。與彼令食。食已飽滿。身得安樂。便得睡眠。晝夜不覺。彼睡眠時。其母即為多殺諸虫。或至千數。斷其命已。置其左右。周圍繞。復置口邊。皆成大聚。彼睡覺已。食彼諸虫。潤身飽滿。還得安隱。尋復睡眠。經七日夜。彼母復於七日夜中。殺百千虫。置其口邊。而為大聚。彼睡覺已。食彼虫聚。而猶未盡。即見其母更殺諸虫。持來聚集。更為一聚。彼即生念。奇哉。我母能為難事。為愛我故。求爾許虫。與我令食。然我於今不知厭足。然不食盡。不知邊際。我今不應如是求食。而令我母為愛我故。為我求食。我今於母能作何報。彼於母所起慈愛心。知有益處。知有恩義。即生愛心。生饒益心。彼資潤身。復以於母生慈念。心稍有柔潤。於即睡眠。身心安樂。彼時遇有取薪草人。皆共見之。即以利斧斷其命根。彼命終已。有旃陀羅名曰氣噓。生彼子家。還有惡心。彼時祖父氣噓死後。氣噓之子復當刑殺。復於後時。彼氣噓子身復命終。既命終已。遂絕此業。有合死者。無人刑殺。爾時大臣啟白王言。大王

當知其主刑者名曰氣噓。其命已終。其彼有子身亦命終。大王當知。今無有人殺合死者。爾時彼王告大臣言。彼氣噓門頗有種族。受彼世業。資生已不。臣白王言。彼氣噓門現有孤子。受其世業。王勅臣言。汝等可往將彼孤子而來見我。大臣受勅。將來見王。王勅之言。童子。汝今既受氣噓世業。資生云何而不習於刑殺合死之人。彼答王言。敬如王教我。有親屬不聽我殺。王今若遣。伏從來命。我暫還家。須與復來。王言童子。汝可知時。宜應速來。彼至家已。所有妻子及諸眷屬。皆斷命已。還至王所。而白王言。大王當知。我之親屬皆已殺盡。更無有人遮我殺者。唯願大王勅我所作。於是即付刀杖。殺具。彼仍不受。王復勅言。汝今何故不受刀杖。彼報王言。大王。我今既名知刑殺害之人。自有牙齒。不假刀杖。大王當知。若無齒力。彼須刀杖。我有牙齒。有合死者。我用齒齧而斷彼命。飲彼血。已資潤我身。增益氣力。於是即取合死之人。以齒齧項而斷其命。即飲其血。飲其血。已倍增氣力。嚴熾威勢。倍更增惡。善男子。彼難調伏殺害人者。於彼時間。多殺眾生。皆飲其血。惡心嚴熾。心智猛利。如是利智得聞菩薩名。無所有。請問世尊。空義斷漏。不起煩惱。顛倒分別。斷瞋恚。意慳貪。妬嫉。無恩。義處。悉能破除。得無言說。從佛所聞。解說之時。聞已。更復增益利智。復入諸佛大神通事。故得如是勝利功德。

爾時復有教示菩薩摩訶薩。從坐而起。整理衣服。偏袒右邊。右膝著地。合掌向佛。欲有所問。

彼合掌時佛神力故水陸所生種種妙花有開敷者色香微妙滿其手中即生歡喜踊躍無量以歡喜意用彼諸花而散佛上再三散已而白佛言世尊今此難調殺害人者已曾發於菩提心耶時佛告言汝善男子宜應還問此難調伏殺害人者是善男子當為汝說爾時教示菩薩還復合掌而問之言汝善男子已曾發於菩提心耶彼即答言善男子知我今即是發菩提心清淨無濁如我聞佛大神通已即斷諸惡而復得聞此無所有菩薩所問世尊解釋聞已信受念持觀察無有疑網於世尊說一切諸法空無有我無生無滅無有境界無境界處無虛空處汝善男子於如此處欲起何心而有所聞教示菩薩復問彼言汝善男子汝於眾生幾所成熟於菩提耶彼即答言善男子我於無量不思議等不可瞋恚諸眾生者成熟安置菩提種子於無邊劫當更成熟所有眾生善男子譬如虛空多所容受佛法亦爾容受無量若有信受彼能成熟亦可成熟一切眾生不著邪徑當作惡業善男子我已為一切眾生利益安樂而為攀緣今向汝說無有虛妄佛自證知若佛世尊不授記者我於菩提我即自記所以者何我已信入菩薩種子已住信忍無疑無惑於此諸佛大神通中此是一切諸菩薩等無有所著發菩提心而為根本若增長已次第能證菩提之果及一切智一切佛法當覺當知次第成熟無量眾生於菩提道亦當成就住於菩薩不動法中善男子如是如是無異

無別能如是者願生諸相然諸眾生有厭離想得無疑惑願當入佛大神通處自見於我少分所以者何其佛神通有無量故善男子諸佛世尊於大神通能決了見諸菩薩等若未得忍唯以信行若諸菩薩有得忍者於佛神通少分已入爾時以佛神通力故於此大地六種震動安樂潤澤無一眾生有驚怖者一切音樂不鼓自鳴上虛空雨優波羅花鉢頭摩花拘勿頭花分陀利花於虛空中自然而有種種天衣懸垂而現燒眾天人所有諸香彼一切眾所有三千大千世界彼菩薩等不知邊際彼等皆悉掬於此花以散佛上如是再三及散此眾於時復有十六俱致百千那由他等蓮花猶如車輪從地踊出彼花臺中有菩薩坐皆悉具足三十二相彼諸菩薩各從花下還以此花而散佛上花供養已合掌禮敬向佛而住

爾時教示菩薩承佛威神而問彼等諸菩薩言善男子等汝從何來彼菩薩言我從十方阿僧祇等諸世界中奉侍禮敬阿僧祇佛聽聞法已而來至此教示菩薩復問之言善男子等汝聞何法彼答之言我等亦聞有菩薩名無所有問佛為解釋亦如此間釋迦如來所解說法亦復如是無有增減彼菩薩亦名無所有於問彼佛彼佛世尊亦如是說不起煩惱令斷疑惑令作光明令近諸佛及一切智無等等法

爾時大眾生希有心皆作是念彼諸人等善得人身善得壽命值佛出世隨順諸佛聞無

所有菩薩所問如是等法信入奉行無相無得不起煩惱世尊我今善得大利善得人身善得壽命我等今者聞無所有菩薩所問佛解釋時聞於耳根如聞信解無有疑惑有所觸證我今得知一切智已亦當如是為諸眾生而作利益得善普覆我等今者假使能以一切珍寶滿此三千大千世界持用布施以如是等猶不能報是無所有菩薩之德而不現身能問如來寂靜之法能斷無量眾生疑惑顛倒之意我等於今當以何事而供養此不現身者爾時無所有菩薩作如是言諸善男子汝等若聞如是等法能信解者即為已作上妙供養一切諸佛及諸菩薩我今所問佛為解釋汝等若得無疑惑處無熱惱處成菩提時為諸眾生作利益故眾生執著令解脫故亦為化彼惡心怨讐害人者故唯若干事以是故問勸請如來我今已顯諸佛法教已照一切無明黑闇

爾時惡心難調怨讐殺害人者見於如是大神通已如彼所知不取上下心得調順無有喜怒說此語時難調怨讐即於彼處踊身虛空而作是言諸善男子一切諸法猶如幻化無有真實分別所作諸法實體如如不動無有顛倒是故汝等所有諸想住持建立如是等想無有實想是顛倒想非有實想是故汝今已得至於無疑惑處亦當得於無礙辯才汝等已脫諸疑惑故求菩提時不由於他常當自體一切開悟時世尊言汝善男子善哉善哉如汝所說爾時難調惡心怨讐而白佛言世

尊我今即是授記。以蒙世尊稱歎善哉。雖然世尊但與我記。為此大眾令得踊躍。心意歡喜。更發勝心。不怯弱故。世尊我今不見彼法。歡喜踊躍。世尊一切諸法。無有思念。無有真實分別所起。以分別故。而有莊嚴。猶如幻化。如夢所見。如旋火輪。我於彼等。如實覺知。如佛世尊。為無所有菩薩解釋。我亦隨順。無隨順故。無所有菩薩經卷第二

無所有菩薩經卷第三

隋天竺三藏闍那崛多等譯

爾時世尊即便微笑。有金色光從佛口出。上至梵世。遍照三千大千世界。遶佛三匝。還從頂入。爾時眾中有一菩薩。名曰不染。從坐而起。整理衣服。偏袒右邊。右膝著地。合掌向佛。白言。世尊。以何因緣。今現微笑。諸佛如來。若微笑者。非無因緣。唯願解說。令眾歡喜。爾時佛告。不染菩薩。善男子。是難調。怨讐。殺害人者。於未來世。過八十九百千阿僧祇劫。已後當得作佛。號曰利上功德。如來阿羅訶三藐三佛陀。當出於世。明行足。善逝。世間解。無上士。調御丈夫。天人師。佛世尊。善男子。而此難調惡心。怨讐。前害人者。於此命終。已後當生兜率天上。彌勒菩薩所。隨彼住壽。彌勒菩薩當下生時。彼於爾時。作大長者。財福無量。一切果報。悉皆開現。即於二十晝夜。供養彌勒世尊。及聲聞眾。彼見彌勒世尊。佛剎莊嚴之事。即生願求。為欲成就莊嚴佛剎。故與諸眷

屬。請彼彌勒如來世尊。及聲聞眾。前後圍遶。以諸供養。一切樂具。三月奉獻恭敬。尊重承事。供養。即以素衣。長八十肘。用畫彌勒如來形像。及彼佛剎莊嚴之相。既圖畫已。奉彼彌勒如來世尊。即發願言。藉此功德。願我當得如是佛剎莊嚴之事。亦如今者。彌勒世尊。阿羅訶三藐三佛陀。所有具足莊嚴之相。願我佛剎諸聲聞眾。智慧具足。願我佛剎諸菩薩等。無量智慧。皆悉具足。作是願已。以金銀華散。於彌勒如來世尊。復作是言。我等當作如是精進。亦當成就。如是佛剎莊嚴之事。如昔釋迦牟尼世尊。釋種勝王。為我示現光明顯照。而於彼時。成熟無量多數眾生。於菩提中。亦如彌勒如來世尊。多菩薩眾。彼利上功德。如來於初會時。菩薩無量。於授記中。皆悉得忍。於第二會。諸菩薩眾。復倍無量。於第三會。復倍無量。如是方便。彼利上功德。如來阿羅訶三藐三佛陀。當有如是諸菩薩眾。而彼利上功德。如來。示教利喜。諸菩薩眾。令行誓願。得初心已。皆令成就。於一切智。乃至菩提。善男子。此難調。怨讐。前害人者。值彌勒佛出世已後。一切生處。壽命無量。唯除一生。補處時。中壽二十歲。而於彼處。於一日中。自身具受一切惡業。無量苦惱。從是已後。乃至菩提。當更修習。覺菩提。已壽命無量。佛滅度後。正法住世。於無量時。無有惡世。如我今日。諂惡眾生。有惡口者。無智慧者。難入道者。魔所持者。我今於中。說法教化。此等眾生。難解難入。此善男子。無有如是諸患難事。善男子。彼佛剎

中。無有諸魔及魔事者。所有利根。通敏眾生。皆集於彼。是故彼佛。利上功德。如來說法。少用功力。而得開解。爾時眾中。有菩薩名。無障淨月。即從坐起。整理衣服。右膝著地。合掌向佛。欲自決疑。及為此眾。令斷疑故。即以偈頌問世尊曰。我問世間燈。智聚無礙者。為欲自斷疑。及於此眾。故。何緣此眾。見。然今利根者。於先殺害人。復得記菩提。大龍願為說。彼往昔行業。既為億數劫。常作惡趣地。多劫數積聚。為癡盲覆故。於多百億劫。常受多種苦。流轉生死中。地獄火熾然。大呼阿毘支。觀彼業如是。復倍生死中。受惡毒蛇身。見即能殺害。多百億生死。受多種苦。已。多百億數劫。得生人道中。復作殺害人。今得見世尊。即生於利根。速斷諸煩惱。發意向菩提。蒙佛為授記。於阿僧祇劫。當成世間燈。名利上功德。彼往昔之事。人上為解說。如是作業事。苦惡之果報。以是億數劫。已受多種苦。若所有善業。教師亦為說。昔所行諸行。惡業與不善。世燈悉照知。唯願為我說。斷疑大丈夫。為我及眾生。及與未來等。能聞此教者。若有懷疑惑。於此法有疑。教師今為斷。現在兩足尊。攝受眾生故。於是善男子。如此往昔行。大名稱願說。爾時佛告。無障淨月菩薩言。善哉善哉。善男子。汝今欲為一切大眾。斷除疑故。能問如來。如是之義。汝善男子。諦聽諦聽。善思念之。當

為汝說彼善男子。如彼往昔所作諸業。如此多數經於百千那由他劫。受諸苦惱。汝等聞已。當信如來勿生恐怖。一向奉持如教而說。爾時無障淨月菩薩。而白佛言。唯願世尊為我解說。佛言。善男子。我念往昔。然燈如來阿羅訶三藐三佛陀滅度之後。過九十億那由他劫。有佛出世。名曰法意喜王。如來應供。正遍知。明行足。乃至佛世尊。彼佛壽命六十八千歲。初會聲聞眾有六十二俱。致百千菩薩摩訶薩。其數復倍。彼佛世界名曰梵王。劫名淨意。彼法意喜王。如來生於彼劫。何故彼劫名清淨意。彼劫常有如來出世。及諸菩薩。是故彼劫名清淨意。善男子。於彼法意喜王。如來住世劫中。此難調怨讐善男子。爾時為王名曰降怨。請彼如來。及比丘僧諸菩薩眾。以一切樂具。三月供養於彼如來。從其聞法。發阿耨多羅三藐三菩提心。彼殖善根。復得值遇十千諸佛。於一切處常修梵行。常得多聞發勤。精進得四禪定。由此善根。復值如來名金剛焰光。於彼佛所出家修道。行於梵行。發勤精進行頭陀法。常在蘭若空閑之處。誦修多羅滿十千部。皆是大乘。亦得四禪及五神通。四無色定。善男子。彼金剛焰如來阿羅訶三藐三佛陀。有十俱。致諸比丘眾。皆阿羅漢。復有八十四俱。致那由他百千諸菩薩眾。常隨世尊。皆得等忍。及陀羅尼。轉不退輪。善解深法。已入無邊陀羅尼門。已能巧入無邊法界。海印三昧。遊戲神通。心得決定。顯現諸佛。住持身體。於諸眾生。常行慈悲。善男子。爾時彼

佛菩薩眾中。有一菩薩比丘。上首法師。名利益上。善說法義。示教利喜。令諸菩薩。得不思議。具足功德。為彼世尊。而作侍者。恒隨遊止。猶如今日阿難比丘。皆能受持諸修多羅。善男子。如是彼利益上菩薩。於自在王如來所說。那由他百千修多羅。悉能受持。能為彼諸那由他等百千菩薩。解說其義。善男子。爾時自在王如來阿羅訶三藐三佛陀。於二萬歲為諸菩薩。諸聲聞眾及諸眾生。說法教化。滿二萬歲。然後乃於一切菩薩及比丘眾。諸天魔梵沙門婆羅門等大眾之中。告彼利益上菩薩言。善男子。汝當受持此不思議。那由他等百千俱。致所修阿耨多羅三藐三菩提法。於後末世。為諸天人。增長善根。護持此法。光顯如來菩提教法。令久住。故受持解說。善男子。是夜過半。諸佛如來。當般涅槃。爾時彼利益上菩薩。聞佛涅槃。悲泣雨淚。從坐而起。整理衣服。偏袒右邊。右膝著地。合掌向佛。而說偈言。

願兩足尊住一劫 利益世間天人等
我今勸請世間眼 願說妙法以教示
深智無惱之導師 勝行住於諸功德
普眼調伏天人者 大神通尊願久住
若聞導師入涅槃 諸天人等心憂惱
導師願愍彼等故 唯願住世見教示
我及百千諸眾生 眾苦逼切生憂惱
皆由導師唱滅度 世親今欲入涅槃
能調於人調御者 唯願普眼尊久住
利益世間天人故 我今勸請佛世尊
爾時世尊為欲利益諸天人。以偈報彼利

益上菩薩言

我已為世作利益 說如是等諸法教
我已充滿諸菩薩 今住諸佛無漏中
即於此夜後分時 我當入般於涅槃
我今付汝此法教 世尊滅後令久住
彼眾聞作是語已 悲泣雨淚作是言
咸共瞻仰彼如來 我及百千眾生等
唯願兩足尊慰喻 世尊於諸世間上
尊滅度後誰作佛 慰喻世間天人等
哀愍軟語而告言 我後復當佛出世
我滅比丘莫懷怖 修行得至無漏智
有菩薩名功德分 名曰智焰兩足尊
於未來世當作佛 為欲攝持此法故
我今勸請汝當知 為於世間天人等
如此法教廣開顯 即時安慰復發言
聞於世尊如是說 無攝受法攝受故
大神通力此甚難 我今攝受於正法
我為導師尊重故 我當捨身及壽命
我當廣宣此法教 乃可守護如來法
不護己身壽命等 彼即能護教師法
若不嘗愛己身者 善男子。爾時彼佛。慰喻彼諸一切大眾。令歡喜已。說法教誨。與威力已。於夜後分。入於涅槃。善男子。彼時世尊。入涅槃後。彼菩薩說。滿足八十千數法門。如是隨順成就眾生。多那由他百千眾生。當得成熟。於阿耨多羅三藐三菩提中。況復住於聲聞乘者。辟支佛乘者。況復流轉於生死中。種善根者。善男子。彼佛如來般涅槃後。正法滅已。於像法中。多有比

丘說有可得說有可滅彼等於是諸修多羅不樂受持復生誹謗善男子於彼時中此閻浮提有一人王名勇健力果報廣大爾時彼利益上菩薩比丘至彼王所為說佛法說於如來祕密之教彼王聞已即於上利益比丘生敬重心即發阿耨多羅三藐三菩提心供養比丘而彼比丘欲教化彼諸眾生故於一切處受諸供養不生厭悔不生倦心彼王供養彼比丘已滿足三月及於八萬四千采女各自莊嚴持諸香華及諸音樂眾寶瓔珞塗香衣服如是等事供養比丘及彼比丘所有門徒八千五百常相隨順一切皆得不退轉於阿耨多羅三藐三菩提善男子於彼之時難調怨讐殺害人者而為比丘名曰寂定威儀善說法要多聞總持滿足十千修多羅等誦持通利能廣分別諸修多羅常說少欲知足法義而彼比丘已得四禪復得五通四無色定而彼寂定威儀比丘多有徒眾其數五百共相隨逐亦有如是威儀勝行

爾時寂定威儀比丘見彼利益上菩薩比丘不熹不悅生於惡心發瞋恚意現於惡色在眾人前說如是言如此比丘何處有於菩提之行何處有於諸佛之法如是雜行於世間行威儀尚無況復當有證於勝智而彼眾人一向唯信利益上菩薩比丘無能壞者爾時寂定威儀比丘復增瞋恨轉更增上從彼地方背面而去我不復熹見是惡事若此比丘行於邪見令諸人眾皆行顛倒至蘭若處欲入三昧以有瞋恨彼彼三昧不能順入況復能定彼有如是強力行故所有禪定三摩拔提及五神通一切皆失彼以如是恚惡心故得大重病爾時彼利益上菩薩比丘作如是念希有乃至如此比丘生大不善瞋恚濁意我於今者應生憐愍為作利益聞深法故爾時利益上菩薩比丘及五千菩薩諸眷屬眾飛騰虛空於彼住已而說偈言

居家自性說菩提
若覺此行演說者
瞋行自性如菩提
若覺如是法行者
愚癡示現菩提等
此示現癡以一行
若有已說諸見行
於此二行中說者
諸佛之法甚深妙
離於分別有所依
若能捨離諸分別
依恃多聞而自矜
寧處居家樂貪欲
信解導師所說法
不用此教中出家
於我想中常繫著
所有動念所演說
若知諸法如虛空
諸如來有如是法
煩惱菩提二無二
若不分別欲及瞋
捨離彼此於二者

欲無分別無破壞
彼覺菩提無上安
世師智者已為說
彼覺菩提二足上
菩提愚癡無異性
當覺菩提無上道
及彼菩提勝上覺
見行不得於菩提
不以有得能知見
善巧智者覺菩提
及以持戒我慢見
捨是等已覺菩提
若聞此法不驚疑
能於一行廣演說
有所得見在閑處
起念我當證菩提
彼等皆是魔羅網
彼則無有於動念
諸普眼等說一行
不得煩惱及菩提
亦不分別於癡等
彼覺菩提諸導師

若不住於有所得 亦不有念及不動
不起我想無依處 彼覺菩提無上安
若捨分別於分別 諂曲幻偽與嫉妬
樂行頭陀戒福德 彼覺菩提無量眼
若聞此法無所捨 於廣說時亦不疑
彼當速成兩足尊 世間無上智自在
甚深諸法最妙勝 不可思量寂無說
若不開發我見者 難覺於多俱致劫
善男子爾時彼利益上菩薩比丘說此偈時
於上空中六十六那由他諸天得無生法忍
復有六十二千眾生發阿耨多羅三藐三菩
提心爾時寂定威儀比丘聞是偈已無喜樂
意心生熱惱遍身皆腫於是人所反生慈心
思惟於此一慈心故餘皆瞋恨於彼時間大
地開裂彼現身墮阿鼻地獄住於彼中億那
由他百千歲數受大極苦於彼命終即受生
於見毒蛇中如是次第經於多億那由他等
百千生中二惡處行大阿鼻獄大叫喚獄還
復生彼見毒蛇中以彼如是不善根故滿足
經於六十二億那由他等百千劫數以彼往
昔於上利益菩薩生一慈心以眼觀視以彼
善根從彼處終得受人身由彼慈心有熏習
故又復以彼見毒蛇母而於彼所起慈心故
復聞如是深妙法故今得如是利智神通善
男子於意云何彼時寂定威儀比丘豈異人
乎今此難調怨讐是也此於往昔有是業障
善男子於意云何彼時利益上菩薩比丘者
莫作異見我身是也諸善男子彼時有王勇
健力者今無所有菩薩是也諸善男子此由

①說(元)流(正) ①見毒。見害身，猶如毒箭也。菩薩藏經：我觀一切世間眾生，於無量劫，具造諸過失，為十種毒箭所中。何為十？一愛毒箭…八見毒箭…

往昔於菩薩邊生如是等瞋恨心故受如是等難知可畏業障惱患諸善男子以如是故若有菩薩當欲淨於諸業障者於諸菩薩恭敬尊重如教師想諸善男子若當欲得不害自身住菩薩者應如是學說此往昔出法品時有九十二那由他等百千眾生得無生忍二十六億那由他等諸菩薩得淨業障爾時難調怨讐先害人者聞佛授記歡喜踊躍飛住虛空高七多羅樹而說偈言 若欲住淨土應如導師說 應信於諸佛 最上大神通 覺佛神通已 知無分別處 於世間無有而難可得者 若聞無所有 所問經法者能信能觸證 則供養諸佛 若學此經已能除諸有想 得捨已作惡 當見諸導師若學於此經 是則見諸佛 親侍諸如來如此經廣說 此則是施度 淨戒所依住忍辱及精進 智慧等本處 若無有所得是處不說著 如世尊所說 學如是調伏若聞於此經 令諸義示現 種種諸供養力盡無能報 不可數多劫 閻面無所見若聞此經者 得到諸佛地 彼寤於愚癡以破無明闇 以得一切空 由聞此經故多種煩惱盡 少有未盡者 猶如於大海取於一滴水 成熟眾生故 煩惱滴不盡悲愍眾生故 不盡彼煩惱 為清淨佛刹不滿於一切 彼成熟眾生 彼彼處不滅亦可彼滿時 如授記菩提 是故諸水滴於瓶中不盡 若一切開現 彼當有佛刹彼即當滿足 無有餘熏習 如是如是處

聞有如是經 能善解說者 諸功德具足爾時彼難調怨讐說此偈已從空而下住於佛前頂禮佛足合掌而住爾時世尊而歎彼言善哉善哉汝善男子快說此偈合於義理無有虛妄無有別異如是如來神通威力一切菩薩於中當學如是學已得眾生空爾時難調怨讐善男子如是思念今者世尊稱我善哉我今稱慶當以何事供養世尊彼即聞於空中聲曰汝可以身供養世尊即問空言云何供養復聞空聲汝善男子汝今宜可飛騰虛空令此大眾皆悉知見住於虛空說如是偈 所有諸慳者 皆由住自身 我已捨一切 今供養導師 爾時彼善男子聞此偈已生歡喜心以佛神力飛騰虛空一多羅樹而說此偈即自捨身供養如來於虛空中自捨身已有千數華柔軟香潔未曾見聞光明香氣滿一由旬猶如日光或經一時或經半時彼諸華等遠佛三匝而供養已佛神力故於虛空中而成華蓋而於彼中說如是偈 我已捨自身 供養諸教師 我不知自身 亦不知世尊 彼於彼時於一切處不知身心不知如來不知眾生不知住處彼於彼時涅槃平等亦無是念我已得證於彼時中有一化佛自然現身而作是言汝善男子汝已成就佛刹種子一切開現於彼佛前合掌而住心生歡喜踊躍無量禮敬彼佛而作是言我今禮佛大神通已令各種相生善根已遍住涅槃平等法中離罪福德如是不住近於善根諸佛法中

彼能親近無所乏短勸請令住於菩提中復說偈言 眾生覺如是 當脫於大苦 生死大險道 所有苦眾生 彼亦不成就 所有言苦者 彼亦受彼苦 不覺此教故 說此偈已默然而住

爾時無名菩薩告彼善男子言善男子汝今已能行一切施若持自身供養於佛善男子汝更不得言我自在汝以此身已用施佛善男子譬如有人施他財已後不得言還是我物彼於彼財不得自在如是善男子汝今以身已施於佛汝今既作如是之言我當來世當得作佛得忍授記善男子汝於今者更欲何作彼聞此已即生疑念我今云何我今云何如是思念彼時即復聞無所有菩薩聲言善男子汝今莫作善男子汝應還念諸佛神通如汝信解應如是報彼向無名菩薩所問聞此言聲即生辯才明見前來無有身心無言無說無施無戒無忍無進無禪無智無斷無常無聲聞無菩薩無發菩提心無如來無如來法無涅槃無涅槃聲無有信者無有所住無有所取無有所言無有縛者無有所聞無所聞者無有所有無所有者無所承攬無所承望一切勝相皆悉具足教化眾生開現具足成就佛刹與涅槃等平等無二無有名說如無可說亦不欲生如無言中如如是住如是如亦無所行彼於諸佛大神通中無復疑惑爾時無名菩薩讚彼善男子言善哉善哉善男子汝今善住佛大神通汝今如是辯才成就辯說如是彼即答言善男子我亦不住佛

~智度論一，佛詰長爪梵志曰：汝已飲邪見毒，今出此毒氣，言一切法不受，是見毒汝受不？

神通中其佛神通無能作者一切諸法真體無名不可得故彼無可入無可出處無可知處如是信已無有住處其佛神通無住處故彼無有人能說名字但無名中我今問汝莫生疲倦其有智者難可承事彼即答言善男子汝今但問我所知者當為解釋彼難調言摩訶薩埵汝今何故名為無名彼即答言我於是處不得言說亦如汝所名字示現彼即答言善哉善哉汝善男子汝今以度佛大神通離於名字彼無名言善男子於平等中無法可離無有可斷無可建立無去無來無平等相善男子若一切法彼平等者無有別離其平等處亦無處所云何斷離若平等法而別有者乃可斷離

爾時眾中有一菩薩名不自在而白佛言世尊何因何緣是無所有菩薩名為無所有佛告彼言善男子汝應還問是無所有菩薩因緣彼當報汝爾時不自在菩薩摩訶薩問無所有菩薩摩訶薩言善男子汝今云何名無所有彼即答言善男子我今不見自身能為一切眾生作利安故能問如來如是等處彼不自在菩薩問言彼所問處與身合耶為不合耶無所有言我所問處不與身合彼復問言善男子汝今云何不與身合成就所問無所有言善男子我以三處發問如來何等為三謂身口意此等三處我問如來善男子是身口意無和合義彼復問言善男子汝見何意而不現身彼則答言我今示汝當信我言我為安樂諸眾生故而不現身彼菩薩言我以

肉眼故不能見無所有言以天眼看彼言天眼亦復不見無所有言以法眼看彼菩薩言善男子所有法行彼亦不離於一切眼於彼處中無法可見無所有言汝云何聞彼復答言彼處無有和合可聞善男子我見如如無所有言善男子於如如中無有三眼不自在言汝云何見時無所有默然而住不自在言善男子於無能見一切法中何故默住其於虛空豈無容受虛空悉能容受諸法無所染著所入無礙於一切法無有假借彼處不著應有解說善男子汝以何緣默無有說彼即答言我今求彼所有語言能解釋處皆不可得我以是故默而不答然善男子汝聽我說以何因緣名不自在善男子我念億劫已曾知為諸眾生等離無益語為諸眾生所作利益柔軟生樂皆悉美妙歡喜踊躍無有龕澁依時利益不生瞋恨說如是言無有眾生怨恨於我善男子以是因緣我得無畏善男子一切眾生無有所畏所以者何諸有語言無有自在善男子汝今觀是諸語言法無有自在我今所說此語言中有成就者彼於三界所不容受所有一切眾生言說若合若散有益無益若雜不雜若念若起若為眾生令淨煩惱令捨煩惱我見彼等皆悉平等若智若愚皆得一名彼言善哉善哉善男子如汝往昔曾供諸佛得是合實語言解釋善男子汝見何利而不現身彼即答言汝今應當問於世尊爾時無畏菩薩而白佛言世尊是無所有菩薩見何等利而不現身佛告彼言善男子唯

除我身於此三界無有眾生如是身相與其等者唯除神通所化勝身成就如是業果報故勿令一切諸婦人見必於此處染著亂意不能聽法不作諸事棄捨本夫飲食無歡染愛迷著多受苦惱是無所有見如是等諸過患故而不現身
爾時無畏菩薩及彼大眾皆生疑惑咸作是念是無所有菩薩身相何如而今世尊作如是說爾時眾中有諸女人一名解染二名寶瓔三名解華四名寶華五名普香六名香自在七名金華八名作愛九名不染十名善住意十一名作光明十二名甜味十三名阿那羅梨耶十四名住持十五名無垢十六名海十七名功德上十八名無過夫十九名調順二十名諸天供養二十一名壞上二十二名普照明二十三名不背二十四名善住持精進二十五名善住二十六名安樂二十七名王二十八名悲如是等類二十八女與姊妹俱從坐而起脫身瓔珞供養世尊右膝著地皆共合掌而白佛言世尊所說無所有菩薩功德如是願於我等承佛威神得見其身成就如是實業果報莫以別身而示我等我今欲見無所有菩薩爾時佛告善女人等汝今欲見無所有菩薩成就色身今欲見耶彼等答言唯然世尊我等有疑願為開解佛言諸女汝等今者見彼身已有何利益汝今勿有還家之意當捨眷屬若見彼身安住具足一切功德彼諸女言我等今者一切能捨決定當見彼菩薩身爾時世尊告彼菩薩無所有言汝無所有此等

諸女欲見汝身。彼言。世尊已言。許可彼姊妹等示現我身。佛言。善男子。我已許之。多人意喜。欲見汝身。當有利益。得勝身心。得妙身心。得淨身心。若見汝身。即當決定於阿耨多羅三藐三菩提。得轉女身。成丈夫身。汝今已有如是淨願。於多諸佛。以百千身。種諸善根。住是願中。於三界中。願我當得最勝佛身。所有眾生見我身者。彼等決定住於菩提。所有女人悉轉女身。若於我所種善根已。思惟如是甚深法已。得忍本性。願當入於真如法中。願當具足諸菩薩法。開現親近於諸佛法。彼無所有菩薩。聞佛此說。作如是言。如是世尊。如世尊教。即於手中。一指端。皆放光明。一一光明。至王舍城。於彼人家。皆悉出現。彼諸光明。有諸眾生。見於彼等。從地踊出。化成諸華。縱廣一尺。昔所未見。色香具足。

無所有菩薩經卷第二

無所有菩薩經卷第四

隋天竺三藏闍那崛多等譯

爾時王舍城中。頻婆娑羅王。而有一女。欲出遊時。頻婆娑羅王。勅諸侍女。其數一千。汝等已為我女眷屬。共相圍遶。於彼之處。王所飲食。汝等常食。汝等常飲。彼王舍城。多有婦女。其數一千。聞此語已。種種瓔珞莊嚴自身。彼諸婦女。見是希有可喜諸花。身心喜悅。不能自勝。欲取彼華。遂不能取。不能遠離。申手欲取。去華一尺。而不能及。見彼諸華。皆悉向於

毘福羅山去而不住。爾時眾人及千婦女。及與頻婆娑羅王女。從王舍城次第而出。彼諸華等在眾人前。微行而進。眾亦不知行與不行。彼諸人眾。作如是念。此華近手而不能取。時彼諸華。一切皆上毘福羅山。彼諸男女。亦上彼山。既上山已。見於如來阿羅訶三藐三佛陀。無量百千大眾圍遶。而為說法。

爾時二十八女姊妹。合掌佛前。勸請世尊。時頻婆娑羅王女。及見彼等。一切諸女。亦見彼等諸女姊妹。勸請世尊。作如是言。此諸婦女。何故合掌在世尊前。何所求請。欲求何願。即聞空聲。而語之曰。此等欲見無所有菩薩身。唯除佛身。於三界中。無能勝者。彼等同聲咸作是言。我等願見彼菩薩身。說是語已。彼諸華等。即便在彼眾人手中。即以此華散如來上。作如是言。唯願世尊。示於我等。無所有菩薩身。爾時世尊。告無所有菩薩言。善男子。汝可示現圓滿自身。令多眾生。見汝身已。種種菩提。因。亦當如汝。於多百千諸如來所。當種善根。爾時無所有菩薩。即現其身。爾時大地。皆悉震動。安隱潤澤。無有眾生。恐怖毛豎。一切音樂。不鼓自鳴。於虛空中。雨眾天華。於一切處。天香人香。皆自然燒。爾時無所有菩薩。示現如是具足色身。彼現身時。諸女人眾。皆生愛樂。一一婦人。皆作是念。是無所有菩薩。唯與於我。共相娛樂。各現於前。亦復不知。彼神通化。各稱其願。於毘福羅山叢林樹下。我於此處。歡喜受樂。我等未曾得聞。如是諸妙音聲。諸色香等。我等今者。荷世尊恩。彼諸女等各

一樹下。七寶贊輿。一切果報。皆悉具足。歡喜受樂。一切所須。悉皆備足。不復更念歸還之想。彼等如是。受歡喜樂。七日七夜。

爾時世尊。為諸眾生。更說法要。若有不見。彼菩薩身。皆由善根。未得成熟。雖望欲見。終不可得。莫知何事。彼等見者。過七日已。見彼菩薩身。漸毀壞。無有精光。受用果報。皆沒不現。唯見一樹。彼等菩薩。漸漸不現。亦無住處。彼即聞於空中。聲言。諸善男子。此是諸行真實體性。汝等不應起常有想。汝等可捨女人身。想。應當願求丈夫之身。無等等身。諸佛之身。汝等可發阿耨多羅三藐三菩提心。受丈夫身。彼諸女人。聞是聲已。於剎那時。心住寂靜。見如來像。具三十二大人之相。彼等見已。皆作是言。願我當得如是妙身。無有染著。無染著處。如此佛身。寂靜無惱。彼諸女人。說是語時。彼諸女人。悉轉女身。得丈夫身。唯除往昔。發願供養。是無所有菩薩等者。乃至道場。然後我當轉於女身。以如是故。不轉女身。所有轉身。得男身者。端正可意。世間天人。皆悉愛敬。爾時佛像。忽然不現。唯見世尊。釋迦牟尼。爾時諸女。得男身者。而白佛言。希有世尊。甚奇甚特。乃有如是。幻化戲者。昔未曾聞。諸凡夫等。心意迷惑。未曾安定。如壓油輪。彼不能住。近善知識。世尊。若有親近於善知識。供養承事。以善知識。威神力。故我於今者。轉離女身。得五神通。世尊。我今憶念。往昔多千佛所。與善知識。同種善根。自捨身命。為令我等。生諸善根。復示彼等。諸佛世尊。為說在家。諸過患。

事方便讚歎出家功德諸勝妙事。我等已經爾許多時近善知識。從爾已來未曾復生諸惡趣中。我於過去未逢教師教示我故。恒常流轉人天。馳逐受諸苦惱。世尊。我今假使能以恒河沙等諸世界中用滿七寶。或已自身具足滿已。施善知識。雖作是事。猶不能報善知識恩。所以者何。由是神力而令我等。當於世間而得作佛。開現成就我等佛刹。皆因此等善知識故。教示我等。詣諸佛所。種種善根。教行種種疾利方便。教我等入深法行中。或出愛語。或示訶責。或言清涼。或說熱惱。或有逼迫。如是教示。一切樂具。一切利養。皆悉捨已。彼等眾生難得值遇。彼等眾生未有所辯。若不得是善知識者。唯除如來。我等無有別善知識。如無所有菩薩摩訶薩者。

爾時無所有菩薩摩訶薩。告諸女人轉男身者。善男子等。我今非但獨為汝等作善知識。我亦為於一切眾生作善知識。善男子等。若有眾生能知無所有菩薩。為眾生作利益成就。彼等眾生更不承事諸餘師友。彼等眾生即忘飲食。不生疑退。無有愛欲。而於我所晝夜親近。所以者何。我今教於一切眾生。和合善根。令住一切世間。出世具足事中。令人無量波羅蜜中。令人一切諸功德中。令住無濁無障淨處。無顛倒處。不現一切諸有相中。住無行處。樂修一切身心薰習具足法中。我已曾令無量眾生。住如是法。善巧智中。我今實語。無有異言。佛自證知。諸天世人而作證明。佛言。善男子。如是如是。如汝所言。爾時大眾

佛神力故。即見東方南西北方有千諸佛。

爾時世尊告諸大眾。作如是言。諸善男子。汝今見此諸佛。已不彼言。世尊。我等皆見。佛復告言。此等已令此善男子成熟。如是阿耨多羅三藐三菩提。彼等更復歡喜踊躍。作如是言。世尊。我等今世現轉女身。已得男身。世尊。是故我今深信此事。解知此事。念持此事。無有疑惑。世尊。我今已得入於佛大神通。漸次小分。皆由於是。無所有菩薩神通力故。願我當得諸佛神通。皆悉開現。願當共此於諸佛所。種種善根。當得一切功德具足。

爾時彼諸菩薩摩訶薩。心作是念。所有身者。五陰聚合。不可得。以名字所說。而有可聞。我等云何。而能共彼種於善根。

爾時世尊。知彼菩薩心之所念。告無所有菩薩摩訶薩。言。善男子。汝今應為此諸菩薩摩訶薩等。說五陰聚和合身事。汝今應為此等菩薩。顯示五陰和合之身。此等聞已。當壞我見。更復當近於佛菩提。

爾時眾中有一菩薩。名曰愛語。而白佛言。世尊。今者見何事故。如來阿羅訶三藐三佛陀。自不解釋。而當勸彼無所有菩薩。解釋佛言。善男子。此眾如是。於無所有。長夜隨順流注歸向。是故我今勸此菩薩摩訶薩說。

爾時無所有菩薩。白佛言。世尊。我今欲說。如我所見。如佛色。空我色。亦爾。如佛色。一切眾生色。亦爾。如眾生色。一切樹林藥草色。亦爾。如一切樹林藥草色。彼一切界和合聚色。亦爾。所有空色及我色。如來色。一切眾生色。一

切樹林藥草等色。一切界和合聚色。無有二相。無知無動無生。無等無有等等。無行無說。非法非非法。非法界非非法界所攝。非空非非空。眾生愚癡。不知不覺。虛妄貪著。慳悋嫉妬。不能拔出。虛妄毒箭。於慳妬中。忘失恩義。無明網覆。遠善知識。多有疑惑。於如此法。不能聽受。當作障礙。不能受持。讀誦修行。而有觸證。有諸菩薩。智慧善巧。猶如虛空。無所著者。於諸世間。所有法中。不得法想。況復餘想。彼等能入於此法行。諸少智者。於無色中。妄起作是想。悵望欲入此法行中。於無色中。妄起行想。略說乃至受想行識中。如是作如色所作。如虛空識。我識亦爾。如彼識如來識亦爾。如如來識。彼識一切眾生識亦爾。如一切眾生識。彼識一切樹林藥草識亦爾。如一切樹林藥草識。一切界和合識亦爾。其虛空識。及以我識。如來識。一切眾生識。一切樹林藥草識。一切界和合識。無二相。不可知。不可分別。不生。無等等。無行。不可作名字。非法非非法。非法界非非法界所攝。非虛空非非虛空。眾生愚癡。不覺不知。無智少智。少聞。嫉妬慳貪。惑著。妬嫉。結縛。無明網覆。為惡知識之所攝者。各自迷惑。欲聞是法。而作障礙。不能受持。讀誦修行。而有解證。有諸菩薩。善巧智慧。無所住著。於一切法。不得法想。何況餘想。彼等能於此行中。行諸小智等。於此法行。所不能知。說此五種色等。平等出離。諸行無有壞散。無別法時。大地震動。虛空雨華。

爾時難調菩薩摩訶薩。白佛言。世尊。何因何

緣大地震動虛空雨華。佛告難調菩薩摩訶薩言。善男子。此是由彼說五陰空。無二無別。無有所住。無可言說。無有藏積。無有散壞。無有邊量。不樂顛倒。說是諸佛自在處時。有百千億那由他數諸天。皆得無生法忍。於此眾中。諸比丘比丘尼優婆塞優婆夷五千人等。皆亦得於無生法忍。於未來世當得作佛。號曰不可說陰聚所生如來。應供正遍知。當出於世。劫名無住。以此因緣大地震動而雨眾華。爾時女人得男身者。皆共同聲而說偈言。

虛妄非虛妄 虛妄虛妄愛 如實知此等
是故皆授記 我等知如是 一切皆虛妄
今得丈夫身 我等皆具足 我聞虛妄已
知解不生疑 如是還虛妄 實無有知說
無實無實中 誘誑諸眾生 不知無實故
無所有教說 於中無所減 亦無有增益
於中無示現 但以假名說 平等無危險
說無有散處 既無有等等 何況有勝者
其色似色形 其色色色故 若知色虛妄
無有可實者 受似於觸形 以受故為受
知受虛妄已 彼無有可實 想為欲想者
其識以想現 知想虛妄已 彼無真實處
諸行無自在 假名示現行 知諸行虛妄
彼無有真實 識以了知義 是故示現識
若知識虛妄 恒常如虛空 如是皆虛妄
所有世憂愁 彼愚輩不知 以住我見故
彼等無所安 彼等無所遣 彼無有住處
愚輩而不知 此法不易知 寂滅句難解
住懈怠我想 為惡作所覆 不見無所有

不聞彼所說 無所可說處 於中無所置
爾時諸女轉男身者。說此偈已。供養佛故。五體投地。頂禮佛足。而說偈言。南無最大力。一切世無上。世尊有大恩。其等無所著。說是偈已。禮敬世尊。合掌而住。爾時世尊告長老阿難。汝受持此無所有所問。我今說法。廣為人說。光顯此法。阿難。汝為何等眾生。當令聞此法本之者。彼等聞已。能廣解義。文句莊嚴。彼等皆當決定。阿耨多羅三藐三菩提。若雖得聞而不解義。於後漸次亦當如是。解其義趣。修行觸證。於多百千那由他數諸如來所種諸善根。所以者何。其無所有菩薩。有如是願。

爾時眾中有諸女等。住於大乘。而白佛言。世尊。何用勸請阿難受持此法。所以者何。我今已受如此法本。習誦通利。世尊。我今聞此法本。於未來世當為他說。於阿僧祇百千那由他劫中。光顯此法。
爾時眾中有百比丘。六百比丘尼。二百優婆塞。優婆夷。復有那由他數諸天子等。以諸雜華散世尊已。作如是言。世尊。此修多羅。而能照明一切諸法。如實顯示。世尊。我今得聞此法本已。即能受持。讀誦通利。猶如明鏡。見其面像。如是如是。我等受持此法本已。是故世尊。我等於今及未來世。如此法本於阿僧祇那由他劫。廣為人說。光顯是行。當令證覺。為諸眾生。令知我等如是利益。我住菩提云何。當作。為諸眾生。一切利益。具佛法故。世尊。我等不貪利養及名聞等。而受此法。為眾生說。亦復不為己自身命。但為一切諸眾生等。欲

與眾生諸樂具。故欲令近於諸佛法。故為於無量諸眾生等。除滅愛著。諸煩惱。故佛言。善哉。善哉。善男子等。汝今一切善說此法。爾時海姊妹白佛言。世尊。此無所有菩薩不起。亦不說如此等。善男子善女人等。說此法本。當光顯故。世尊。彼當受持正法。亦為一切過去未來現在諸佛所有法行。彼亦受持讀誦通利。亦教他人讀誦通利。若教令知。

爾時無所有菩薩摩訶薩。告海姊妹言。過阿僧祇百千劫中。彼時有劫名曰法寶開敷。於彼劫中。滿足五百諸佛出世。時有一佛最初出世。名難降幢。如來應供正遍知。明行足。善逝。世間解。無上士。調御丈夫。天人師。佛世尊。於彼時中。亦復多有眾生。住於煩惱濁中。業障所覆。煩惱增上。貪欲。恚癡。諸惱增上。含毒所惱。善女人。爾時彼難降幢佛如來。應供正遍知。我於爾時亦如是問。彼佛如來亦如是解釋。如今世尊釋迦牟尼如來。應正遍知之。所解釋。善女人。如是次第五千諸佛。亦如是問。如此法本。彼諸世尊亦復為我如是解說。如今世尊釋迦牟尼諸釋中王。為我解說。善姊。汝今安意。善姊。我從今已於未來世。當於無量阿僧祇數諸佛世尊。亦當如是問此法本。所有如是諸佛剎中。亦有諸濁煩惱眾生。或有少者。或復倍多有煩惱者。

爾時無所有菩薩摩訶薩。說此語時。於剎那頃。彼摩伽陀主頻婆娑羅王。有大勢力四兵圍遶。次第漸行。尋彼諸女所行之處。來詣佛所。到佛所已。頂禮佛足。却住一面。佛慰勞已。

隨所敷具而就其坐。彼諸大眾亦皆而坐。時頻婆娑羅王白佛言。世尊。我有少女與眾侍女出遊園林。久乃不還。後於園中求覓不得。又聞有說向世尊所。今於此眾我復不見。佛告大王。今會當見。王言。世尊。我今未見。佛言。大王。汝今可問無所有菩薩。當示王處。王言。世尊。其無所有菩薩何者是也。於時世尊告無所有菩薩言。汝無所有。汝今應報頻婆娑羅王所問。諸女行來之處。令此眾知。

爾時無所有菩薩以不現身。告頻婆娑羅王及大眾言。大王當知。彼諸女等在此眾中。王言。大士。我但聞聲不見汝形。菩薩告言。大王。今者所有諸女聞我名已。一一婦女至於樹下。皆取我身隨意娛樂。取我身已。皆捨女身受。丈夫身。彼等諸女既取我身成丈夫身。我則無身。然無所有菩薩告彼諸女丈夫身者言。汝善男子。各各示現自身之德。爾時諸女得男身者共集一處。具丈夫相端正可意。作如是言。我等今者捨於女身已成如是丈夫之身。爾時頻婆娑羅王及諸大眾生疑不信。爾時無所有菩薩復作是言。大王。何故及諸人眾猶懷疑惑。王今於佛豈不可信。若可信者如來現前。王今宜問。此善男子。如是所說有異不耶。爾時頻婆娑羅王白佛言。世尊。如是如是。如虛空聲所說以不。而不見身。爾時佛告頻婆娑羅王言。如是如是。大王。皆悉如此。菩薩所說。大王今者宜信此語。莫生疑惑。王聞是語即起合掌。二稱善哉。白言。世尊。是誰神力。為是菩薩無所有力。為當是佛威神之力。佛告王言。

大王當知。此是諸女往昔願力。彼於往昔於多千佛。教此諸女種諸善根。發菩提心。諸佛法中而得成就。故今我所得滿其願。大王。有諸女人於未來世。亦更教化無量諸女得轉女身。爾時佛告無所有菩薩言。善男子。汝今可為於此眾人。令此諸女各復本身。爾時無所有菩薩作如是言。如我實說。我於無量無邊婦女。令轉女身得丈夫身。皆是實故。此等眾生還復女身。說是語時。多有婦女於彼丈夫前有如是形。有如是色。如是行住。還復如先所向來者。彼等各各相共言說。如前無異。彼時諸女及頻婆娑羅王等生希有心。云何諸女已轉女身。今已還復女人身耶。此諸女人為是實身為當化起。佛言。大王。此等婦女非實非化。所以者何。大王。此善男子。於往昔時有如是願。若諸婦人見我身者。彼見我身即發是願。求轉女身。彼諸婦人所有夫主更取餘婦。還復如是不增不減。如前婦身可愛端正不相離別。爾時頻婆娑羅王而白佛言。希有世尊。諸菩薩摩訶薩等能有如是神通善根。世尊。一切諸法不可思議。眾生果報不可思議。得禪定者定之境界不可思議。佛言。如是如是。大王。如是如是。大王。此有三種不可思議。何者。為三。業幻量幻。梵本少此善男子。已覺諸幻已證已觸。此善男子。即是幻師。是故此等不可取量。爾時世尊令彼大眾以無所有和合法義。教化言說。令得歡喜。令得威神增長教化。令歡喜已。勸言。汝等各自知時。還其所至。時諸人眾各還本處。其去未久。有一菩薩名曰生疑。

而白佛言。世尊。其無所有菩薩能為此等眾生。以神通化還令如舊。而不令彼諸眾生等有愛別離。世尊。此等當作何等利益。佛告生疑菩薩言。善男子。此諸人等所在之處。共此諸女曾轉根者。語言飲食共相娛樂遊行戲樂。種種諸事種種方便。於彼時處令此眾人於菩提中令得發心。近佛法中。何以故。善男子。此無所有菩薩。已於往昔諸如來所。以一切樂具供養尊重。種種善根皆已具足。發如是願。是故滿願。滿分別意。此善男子。如是教化成熟眾生。教令入於義文字中。所有法體無生之處。無成就處。令入令覺。如是教中不令有失。令得成就於佛法故。善男子。此無所有菩薩。教化眾生於彼中者。無一眾生當向惡趣。無一眾生於所教師。過去佛土而不中生。善男子。彼諸眾生還當如是成就菩提。亦如今者無所有菩薩所成就者。爾時生疑菩薩從佛世尊聞善說已。除諸疑惑。而說偈言。

眾生聞以得於中方便學 如是健修習 名無所有者 純直心柔和 軟意無嫉妬 亦無有怯弱 名無所有者 多文字和合 復說如是義 所有無可見 亦當無所觸 無二不可取 無餘不可見 不可說而說 法教無有比 爾時閻那那修多女告生疑菩薩言。善男子。汝承誰力能說此偈。彼即答言。我身如是知。無所有菩薩身中從出是聲。善姊當知。今此偈聲非我身出。爾時閻那那修多女而白佛言。希有世尊。是無所有菩薩。乃至能得不思議法。

爾時生疑菩薩從佛世尊聞善說已。除諸疑惑。而說偈言。眾生聞以得於中方便學 如是健修習 名無所有者 純直心柔和 軟意無嫉妬 亦無有怯弱 名無所有者 多文字和合 復說如是義 所有無可見 亦當無所觸 無二不可取 無餘不可見 不可說而說 法教無有比 爾時閻那那修多女告生疑菩薩言。善男子。汝承誰力能說此偈。彼即答言。我身如是知。無所有菩薩身中從出是聲。善姊當知。今此偈聲非我身出。爾時閻那那修多女而白佛言。希有世尊。是無所有菩薩。乃至能得不思議法。

皆已具足。能以種種方便開示。彼無所有之處。說法。佛告彼言。如是如是。善女人。如汝所說。爾時兩時無有出生菩薩。而白佛言。世尊。我能辯說。無所有所問。修多羅。佛言。兩時無有出生菩薩。汝今為辯說。諸菩薩摩訶薩。境界廣。境界無礙。無可得。無邊無畔際。發起多聞。與利益故。以善巧智。如諸菩薩摩訶薩。為自境界增長。無著無可得。無邊無畔際。諸多聞利益。欲於善巧方便法中。教令建立。開現處故。當速成就菩提道故。

爾時兩時無有出生菩薩摩訶薩。而說偈言。

善說此經已。正念入禪定。當覺一切法。顯示此經典。令覺一切義。及如文字等。所有修多羅。諸佛之所說。顯現一切義。彼此皆相見。無量不思議。諸經善說處。此經法知已。莊嚴義文字。諸法無缺少。一切不思議。陰界諸入等。當得方便智。隨順十二緣。一切聲一聲。一聲一切聲。諸聲等和合。於此經覺悟。所有諸心者。眾生所思覺。計我所思者。一切心所因。一切皆能知。是等諸思覺。彼無有思慮。於此經覺悟。亦無有思者。於自及與他。一切悉能知。如心所轉行。照諸法如鏡。說此修多羅。於彼此等見。彼等還覺此。一切非為一。不見別多說。一切文句離。若見於此經。彼為眾生說。眾生非此彼。令彼眾生脫。住著不動處。知一切虛妄。以虛妄為說。既知虛妄已。不著虛妄中。無有所生道。諸佛見一切。於此無不覺。

能覺此經者。一切功業處。呪術醫方智。及時智所生。皆此經覺悟。一切一切智。所有不可數。彼一切次第。於此經悉知。一切見捨已。眾生所迷惑。若知於此經。不著彼名字。眾生著令脫。彼相所覆者。此經威力故。於中得實證。若學此經者。彼得一切報。天上及人中。一切功德具。亦是教師法。此即是父母。和上阿闍梨。亦是善知識。此知足少欲。具足諸頭陀。此所修資財。皆為彼當作。若有大眾生。欲說多種法。應當學此經。學一切法處。若有大眾生。欲說多種法。彼應學此經。一切法持處。生處皆當得。少病長壽命。常得諸禪定。隨順此經已。身常受安樂。心亦得常樂。若能證此經。口業悉具足。如是差別法。彼當得隨順。若能證此經。即總持諸經。若能如是證。如此經中說。彼等皆知經。諸佛有所說。所有諸文字。所說諸法者。若聞於此經。則離於文字。諸法離文字。以文字說法。文字非是法。文字非非法。彼等於此經。住於菩提中。彼等於此求。世間最名聞。

爾時兩時無有出生菩薩說此偈已。頂禮世尊。右遶三匝。即於佛前沒而不現。爾時眾中有一菩薩名無所續。而白佛言。世尊。此兩時無有出生菩薩。從何而來。佛言。從如所來。還如是去。彼菩薩言。世尊。彼云何來。復云何去。佛言。如影幻夢。焰響虛空。及與空無相無願。無作離欲寂滅。無實無像。如是等。

聚分別遣來。汝今語我。生於一切。一切眾生。一切菩薩。一切諸佛。亦如影幻夢。焰響虛空。及空無相。無願無作。離欲寂滅。涅槃無實。彼等所有一切果報。及彼名字。彼等皆是我等所為。彼等及我。一切非一。非二。非多。非少。亦非有物不可聞。不共具足。無有能見者。無能知者。無能聞者。是故汝等從我等聽。信解思惟。歡喜稱善。彼等無量阿僧祇數。行無實已。皆不可得。汝等亦不可得。汝等莫以虛妄誹謗我等。莫毀我。我等既無。有物無相。無有處所。為他何假。須說。寧不說勝。若有說者。彼還是如彼。此還是如此。如是遣如遣。如是說已。如是來。爾時大眾得聞。如是句義已。無色。心無出入息。無物染著。彼等於世尊所。一切樂具。皆悉遍滿。彼等得本念已。作如是言。此是本性體真實。無所有。無可證。無所識。如是知已。無知故。如是如是。彼從何處有。不可作名字。爾時於上虛空。有無價寶遍滿其間。有菩薩名滅及無。出生菩薩。白佛言。世尊。是何瑞相。此無價寶遍滿虛空。佛言。善男子等。有若干菩薩等。聞此無所可證法門。得出離已。皆悉已得無生法忍。故現此相。

爾時彼諸一切大眾。皆白佛言。希有世尊。善巧能學。巧方便智。為欲解脫諸眾生故。世尊。乃能知此一切無動空。無所有。無有眾生。本性寂靜。然今如來。為諸眾生。辯說諸法。一切如影。而能勤勞教化眾生。佛言。如是如是。諸善男子。如汝所說。諸善男子。若無辯說。云何能知影。像幻夢。焰響聲。及與虛空。無相無。

願無作離欲涅槃之法。而為虛妄影像等法。爾時以佛威神力故。於上虛空間。如是聲。世尊。何者是彼影形為影。世尊。何者是彼乃至虛妄而為影形。世尊。此一切莊嚴已具足。法本不假莊嚴。世尊。譬如畫師若畫弟子。善學伎能。畫如來像。具足眾相。無所缺少。更有金巧師取最勝金。作其金鬘。而著頂上。然彼形像倍更端正。為一切眾瞻之無厭。世尊。如是如是。如此法本具足。諸相瞻之無厭。世尊。今者更倍莊嚴。說是語已。時佛告彼虛空聲言。譬如巧學幻化之師。若幻弟子。善於幻化。幻作男女。端正可喜。諸根具足。皆共和合。而生子息。為作名字。影像幻夢。陽焰響聲。太虛空等。不自在也。無相無願。無作離欲寂滅涅槃。彼虛妄等增長成就。所有作事。入深山谷。多人眾各發大聲。呼諸影像。乃至虛空。彼出聲已沒。而不現於彼空谷。無所染著。彼時眾人求聲處。了不可得。如是一切諸煩惱等。如實求之。亦不可得。如彼陽焰動搖似水。而不可飲。如是響聲。陽焰。俱無形像。

爾時眾中未證法者。聞此說已。皆得證法。有二十億。那由他等。諸天及人。皆悉得於一切法中。無所染著。爾時虛空還復出聲。諸天人眾皆悉見聞。此唯名字所謂影等。乃至虛妄影像等也。影像幻化。其有所問。如來解釋。於先作證。有二十億諸天人等。聞此法已。皆得決定。住於阿耨多羅三藐三菩提中。當為成熟諸眾生故。而為之友。爾時聞持菩薩白佛言。世尊。當何名此法本。

我等云何受持。佛言。此法本名諸罪無相無捨。如是受持。如來自在。如是名持。無所有菩薩所問。如是名持。說佛大神通。如是名持。惡心難調。怨讐悔過。如是名持。無所有法。可示現者。如是名持。非不見一切諸法。如是名持。佛說此經時。其無所有菩薩。及難調怨讐。聞持菩薩。及彼大眾。天人阿修羅。乾闥婆等。聞佛所說歡喜奉行。無所有菩薩經卷第四

師子莊嚴王菩薩請問經序

No. 486

終南山豐德寺律師道宣撰

觀夫法王利見。權巧殊途。或聲光動人。或開智攝物。立儀列相。興像設之機緣。聚砂塗香。表乘時之淨養。斯德有歸。可略言也。有師子莊嚴王菩薩者。學周八藏。智越五乘。籍勝報而開教端。寄善權而行圖範。故使方壇外啟圓場。內羅列八座。而延八聖。陳四報而成四德。空有兩業。自此脩明。大小諸乘。因茲增長。可謂總攝六度之玄略。統陳願行之明規。其道易而可修。其儀約而難隱。智有通塞。道涉眾隆。時運所歸。近聞東夏。逮龍朔三年冬十月。有天竺三藏厥號那提。挾道間萌。來遊天府。皇上重法。降禮真人。厚供駢羅。祈誠甘露。南海諸蕃。遠陳貢職。備述神藥。惟提能致。具表上聞。霈然下遣。將事道途。出斯奧典。文旨既顯。冀由來之所傳。道場不昧。起機緣之淨業。輒以所聞序之。云爾

師子莊嚴王菩薩請問經

大唐中印度三藏那提譯

如是我聞。一時佛在王舍城耆闍崛山中。與大比丘眾千二百五十人俱。菩薩摩訶薩五百人。天龍夜叉乾闥婆阿修羅迦樓羅緊那羅摩睺羅伽人非人等。無量八部前後圍遶。聽佛說法。爾時眾中有菩薩摩訶薩名師子莊嚴王。從座而起。來詣佛所。頂禮雙足。遶無數匝。而白佛言。世尊。我於過去億百千那由他諸佛所。廣預大會。然未曾覩如今所見。欲有請問。唯願聽許。佛言。隨汝所問。當為解說。

爾時師子莊嚴王菩薩白佛言。世尊。如來往昔修何勝行。今獲如是人天中尊。為諸菩薩大聲聞眾。天龍八部之所圍遶。供養恭敬。尊重讚歎。願為演說。往昔因緣。令諸眾生獲大善利。佛告師子莊嚴王菩薩摩訶薩言。善哉。善哉。汝今乃能安樂眾生。故作是問。諦聽諦聽。善思念之。當為汝說。善男子。我憶過去無量世時。有佛出興。名不可思議。光明如來。應供正遍知。明行足。善逝。世間解。無上士。調御丈夫。天人師。佛世尊。時有長者名曰上施。自恃豪富。不信正法。而於佛所。無歸敬心。有一比丘名毘闍耶三幡^{補我}。見是長者。生憐愍心。起大方便。要令此人發心修行。得成正覺。作是念已。往長者家。爾時上施覩見比丘。顏貌殊勝。威德備足。諸根寂定。容光熾盛。肅然敬重。即起奉迎。頂禮既訖。設座令坐。合掌白言。自顧薄德。忽蒙臨降。

爾時比丘告長者曰。有大法門名八曼茶羅。功德無量。今為汝說。廣欲慧利諸天人。故若有眾生聞此法門能修行者。在所生處獲四勝報。一者與善知識諸大菩薩同處受生。有大眷屬資財豐足。二者眷屬既多自在無礙。三者身相圓備無有疾病。四者眾具自然隨念而至。縱被山壓身無痛苦。能知眾生心之所念。慈悲憐愍將護拯濟。

爾時上施聞是法已。歡喜踊躍重加頂禮。讚言善哉。願為廣說。八曼茶羅最勝法門。我當修學。比丘告曰。汝欲知此最勝法者。先發是願。我欲供養三世諸佛大菩薩眾聲聞緣覺。作是語已。道場之處當作方壇。名曼茶羅。廣狹隨時。其最小者縱廣四指。或一搽手。用種種香及以餘物。或地上作。方院之內。列八圓場。為欲供養八菩薩故。何等為八。觀世音菩薩。彌勒菩薩。虛空藏菩薩。普賢菩薩。執金剛主菩薩。文殊師利菩薩。止諸障菩薩。地藏菩薩。如是長者。此八曼茶羅最勝法門。是彼不可思議光明如來所說。我親受持。今為汝說。應當修學。廣令流布。用此善根迴向阿耨多羅三藐三菩提。長者當知。若有修行此八法者。則為供養三世諸佛大菩薩眾。緣覺聲聞。斯人常為諸天擁護。若諸國王能自修學。若使人作。使王國內諸惡皆滅。諸善男子及善女人。有能修學八法門者。命終之後不墮惡趣。邊地邪見不善律儀貧窮家生。是故當知。欲得現在未來勝上報者。當學如上八種法門。欲得受身端正聰明利智。若欲上生四天王處。亦

應修學八曼茶羅。如是欲生三十三天。夜摩天。兜率陀天。化樂天。他化自在天。乃至帝釋梵王魔王。轉輪聖王所生處者。皆當修學如上八法。欲得天上人中大姓家生。眷屬成就財寶盈溢。身心安樂。名稱遠聞。所出教命無不信任。於諸眾中最尊最勝。皆應修學如上八法。若欲修成須陀洹果。斯陀含果。阿那含果。阿羅漢果。辟支佛道。入菩薩位。乃至阿耨多羅三藐三菩提。皆當修學八曼茶羅供養法門。

佛告師子莊嚴王菩薩摩訶薩言。爾時比丘毘闍耶三幡婆者。豈異人乎。今文殊師利菩薩是。爾時長者上施者。即我釋迦牟尼佛是。我從是來經於多劫。修行供養此八法門。具獲如上功德利益。餘有眾生隨能修學。亦皆同獲如我所得。善男子。我行菩薩道來。經三阿僧祇劫。修滿六度利益眾生。成等正覺。所有光明威德勢力。破魔兵眾。斯誰力乎。皆由供養八曼茶羅道場功德。是故眾生聞說如上八種法門。無宜不學。若以華香燈明。若以飲食幡蓋衣服音樂。讚歎禮拜發願懺悔。隨其力能。皆蒙福祐。或行六波羅蜜時。修立道場。以諸香水。若香塗地。若水若土。作方圓壇。斯即名為檀波羅蜜。修供養時。身口意業不惱眾生。斯即名為尸波羅蜜。修供養時。若有蟲蛇來入道場。驅去還來。爾時安忍。斯即名為羸提波羅蜜。修供養時。善心相續。斯即名為毘梨耶波羅蜜。心不散亂。一心供養。斯即名為禪波羅蜜。作業之時。方壇圓場無有偏斜。善能通曉廢立機候。斯即名為般若波羅

蜜。善男子。如是一法隨心變現。即能具足六波羅蜜。應當廣說教化眾生。為大利益。乃至成佛。說此經已。師子莊嚴王菩薩摩訶薩。及諸天龍夜叉乾闥婆阿修羅迦樓羅緊那羅摩睺羅伽人非人等。皆大歡喜信受奉行。師子莊嚴王菩薩請問經

離垢慧菩薩所問禮佛法經序

No. 487

終南山釋氏道宣撰

惟夫。幔幢難偃。三界由此輪迴。愛水未清。四惑因茲流洩。自非獨拔開士。出有至人。何能裂愛網而關重關。質深疑而啟昏趣。有離垢慧菩薩者。道高初住。德跨八恒。假時俗之津途。發深識之嘉問。如來以無緣之勝辯。赴有待之幽情。斷五趣之蓋纏。籍五輪之禮念。所以五通五眼。自此增修。五位五生。承斯圓滿。蘊結中夏。千六百年。頽運有蹤。載聞東壤。洎龍朔三年。有天竺三藏。厥號那提。統括六異之宗。窮微四圍之典。九部八藏。詞無昧於自他。十諦一乘。義有歸於空色。並詳略名理。妙達宏致。來儀帝里。頻謁天庭。降厚禮於慈恩。將歸飛於海表。以此經群聖之發軔。凡眾之初心。乃出流布傳於道俗。遂依繕寫。所在通之。恐未悉其來由。故因敘其緣致。云爾。

離垢慧菩薩所問禮佛法經

大唐三藏那提譯

如是我聞。一時佛在室羅毘悉帝城勝德林

中給孤獨園與大比丘眾五百人俱。菩薩無
央數。又與無量婆羅門。毘舍首陀。并諸長者。
各各皆是大眾之首。與其同類來至佛所。又
有天龍夜叉乾闥婆阿修羅迦樓羅緊那羅
摩睺羅伽。在大法會前後圍遶。

爾時眾中有菩薩摩訶薩。名離垢慧。即從座
起。偏袒右肩。右膝著地。恭敬合掌。前白佛言。
世尊。欲有少問。願見聽許。佛言。恣汝所問。當
隨意答。離垢慧菩薩既聞佛許。踊躍無量。而
白佛言。若有善男子善女人等。於如來所。云
何恭敬禮拜供養。佛言。離垢慧。善哉善哉。汝
多悲愍。饒益安樂。一切人天。當善諦聽。為汝
解說。若善男子及善女人。欲於佛所起禮敬
者。先應發願。作如是言。我今至心頂禮十方
諸佛。普入一切諸勝法中。我今五輪於佛作
禮。為斷五道。離於五蓋。願諸眾生常得安住
無壞五通。具足五眼。願我右膝著地之時。令
諸眾生得正覺道。願我左膝著地之時。令諸
眾生於外道法不起邪見。悉得安立正覺道
中。願我右手著地之時。猶如世尊坐金剛座。
右手指地震動現瑞。證大菩提。今我亦爾。共
諸眾生同證覺道。願我左手著地之時。令諸
外道難調伏者。以四攝法而攝取之。令人正
法。願我首頂著地之時。令諸眾生離憍慢心。
悉得成就。無見頂相。離垢慧。是為五輪作禮
之相。次禮十方現在諸佛。應作是言。
南無東方阿閼如來。廣及彼方無量世界一切
如來。諸大法藏。并諸菩薩聲聞緣覺一切賢聖
南無南方寶相如來。廣及彼方無量世界一切

如來。諸大法藏。并諸菩薩聲聞緣覺一切賢聖
南無西方無量壽如來。廣及彼方無量世界
一切如來。諸大法藏。并諸菩薩聲聞緣覺一
切賢聖

南無北方妙鼓聲如來。廣及彼方無量世界
一切如來。諸大法藏。并諸菩薩聲聞緣覺一
切賢聖

南無東南方因陀羅雜都幢王如來。廣及彼
方無量世界一切如來。諸大法藏。并諸菩薩
聲聞緣覺一切賢聖

南無西南方寶遊步如來。廣及彼方無量世
界一切如來。諸大法藏。并諸菩薩聲聞緣覺
一切賢聖

南無西北方娑羅因陀羅王如來。廣及彼方
無量世界一切如來。諸大法藏。并諸菩薩聲
聞緣覺一切賢聖

南無東北方無量幢王如來。廣及彼方無量
世界一切如來。諸大法藏。并諸菩薩聲聞緣
覺一切賢聖

南無上方智光如來。廣及彼方無量世界一切
如來。諸大法藏。并諸菩薩聲聞緣覺一切賢聖
南無下方毘盧遮那如來。廣及彼方無量世
界一切如來。諸大法藏。并諸菩薩聲聞緣覺
一切賢聖

次又歸命娑訶世界本師釋迦牟尼如來。廣
及十方無量世界一切如來。諸大法藏。及入
地菩薩摩訶薩聲聞緣覺一切賢聖

又作是言。我今一心頂禮如上一切佛法諸
賢聖眾。當願證知我。從今日乃至菩提。常行

歸依佛世尊者。大慈悲者。一切智者。一切知
見者。諸畏已離者。人中大師子。大龍王。人中
大仙士。大丈夫。一切遍知不思議身。無上身。
無等身。不與二乘共身。清淨法身。一切眾中
最尊上者。我今至誠一心歸命。如是歸命百
遍千遍百千萬遍。乃至無量無數遍。盡未來
際。徹骨徹髓。歸依如上諸佛世尊。

又作是言。我今以身口意三業善根。共諸眾
生。歸依於佛。常不離佛。如是歸依坐道場者。
常住常恒不遷變者。不老不死不滅壞者。無
住無緣性寂靜者。住於法舍作大護念。為洲
渚者。為歸為依證涅槃者。於諸法中住最上
者。我今至誠懃鄭重。歸命如是諸佛正法。
重又如上至誠歸命住種性中諸菩薩等。從
歡喜地乃至法雲。住於十地諸菩薩僧。

次應懺悔當作是言。唯願十方諸佛世尊。證
知憶念。哀受我懺。身業三種。行殺盜婬。口業有
四。妄言惡口兩舌綺語。意三業。行謂貪瞋癡。
自作教他。見作隨喜。如是十惡。今悉懺悔。又重
思惟。無始已來。輪轉六道。於諸眾生種種欺
負。大斗重秤。取物自資。輕秤小斗。便與他物。假
飾衣金。潛行毒藥。皆為損害。今悉懺悔。或謗
三乘。妄說法律。輕慢三寶。欺調二親。於諸尊長
和上。閻梨耆老之前。不生祇敬。如是等過去諸
罪。今悉懺悔。現在惡業。誠心發露。所未作者
更不敢作。今於諸佛諸菩薩等最大眾首。無
比無上無等等前。發露懺悔。不敢覆藏。一懺
已後。更不重造。如是懺悔。第二第三亦如上說。
次應勸請當作是言。十方諸佛若未轉法輪。

若欲入涅槃者，我皆勸請，唯願久住於無量劫，愍諸眾生，雨大法雨，轉正法輪，不般涅槃。次應隨喜當作是言：十方所有三乘賢聖，數如恒沙，及一切眾生修行六度，助菩提法，我皆隨喜。次應迴向當作是言：十方三世諸佛作業，及諸菩薩聲聞緣覺所行六度，盡已迴向無上菩提，我亦如是迴向佛道。

次應發願，仰惟十方三世諸佛菩薩，皆發弘願，盡虛空遍法界所在，流化為諸眾生，三界所攝，無有遺餘，願令眾生利樂成熟，具善律儀，住大涅槃。今並現前，我亦如是大誓莊嚴，願我於無上道心不散亂，常見諸佛常聞正法，承事修行，無有空過，所作善法及菩提心，亦不退失。所生之處，供養聖眾，教化眾生，得無上道，轉正法輪，具大神通，亦令眾生如是修學，至不退轉。

又願一切眾生早斷諸苦，速證涅槃，住如來智。我既出於生死覺悟一切，亦令眾生出離生死，解脫煩惱覺悟一切，唯願十方諸佛證知我行菩薩道，發願願海，爾時世尊重說頌曰：

願我所生處 隨業而受形 成大丈夫身
有信諸根具 通伎術藝能 廣解諸教意
世事悉棄捨 諸欲皆遠離 正語住法念
莊嚴菩提心 敬事善知識 有情咸見重
戒儀既具足 淨受念樂報 常畏彼惡業
遊步於善法 恒依十度行 故得成菩提
乃至最後身 常與眾生樂 珠中摩尼勝
能成利他事 願我窮未來 利益無休息
佛告離垢慧菩薩摩訶薩言：若有眾生行菩

薩道，如我所說，當依修學，說是經已，離垢慧等及諸大眾，天龍夜叉乾闥婆阿修羅迦樓羅緊那羅摩睺羅伽人非人等，聞佛所說歡喜奉行。離垢慧菩薩所問禮佛法經。

寶授菩薩菩提行經

No. 488

西天譯經三藏朝散大夫試光祿卿明教大師臣法賢奉 詔譯

如是我聞：一時佛住廣嚴城大林樓閣中，與大苾芻眾千二百五十人俱，皆是大阿羅漢，諸漏已盡，無復煩惱，逮得己利，盡諸有結，除諸重擔，所作已辦，如大龍王，心善解脫，慧善解脫，得深解脫，心達正道，調伏諸根，威儀詳審，唯一補特伽羅尊者阿難，受於佛記，奉持法藏。復有大菩薩眾一千人俱，皆得不退轉地，總持法門平等法忍，是大智者，具大信重，言行相應，斷諸疑惑，面相圓滿，亦無鬻鬻，常大歡喜，具大精進，是法王子，知法自性，說法無倦，所說之法，離諸戲論，化度眾生，發起佛智，凡所導利，功不唐棄，得大忍辱，離諸顛倒境界之法，滿足十地，善知三時，明了自性，不生不滅，永斷纏縛，威儀具足，證得空三摩地，無相三摩地，無願三摩地，雖出生死，常行輪迴，不樂聲聞緣覺之行，唯以發起大菩提心，應根說法，其名曰：慈氏菩薩、妙吉祥菩薩、辯積菩薩、寶手菩薩、香光菩薩、無邊光菩薩、除蓋障菩薩、勝義心菩薩、得光王菩薩、斷一切憂暗菩薩、薩哩嚩尾沙摩那哩尸菩薩、內行菩薩、無邊意菩薩、具大精進步意菩薩、寶海菩薩、

莊嚴王菩薩，具大神通，王菩薩，無差步菩薩，勝意菩薩，普滿菩薩，阿那嚩囉擊那哩尸菩薩，常喜菩薩，上金光菩薩，觀一切法意菩薩，阿耨嚩馱那羅拘酥彌多菩薩，首積菩薩，無憂吉祥菩薩，須彌藏菩薩，觀自在菩薩，香自在王菩薩，歡喜王菩薩，無邊慧藏菩薩，持一切妙法藏菩薩，師子吼音菩薩，如是等大菩薩摩訶薩而為上首。

爾時世尊食時著衣持鉢，與二千苾芻眾而共圍繞，入廣嚴城乞食，是時世尊入城門時，以大慈悲現神通力，放大光明照耀一切，變廣嚴城而為瑠璃，令四衢道皆悉清淨，其有眾生蒙光所照，盲者得視，聾者得聽，瘡痂之者皆悉能言，迷惑之者咸得正念，天花如雨降滿城中，天樂自鳴，妙音清亮，下至阿鼻地獄上至阿迦膩吒天，其中眾生唯受大樂，是時廣嚴城星賀里蹉尾王有子，名曰寶授，年始三歲，乳母抱持在於殿上，時彼寶授忽見光明希瑞之相，又聞城中種種異事，從其懷抱速下於地，向乳母前端然而立，說伽陀曰：何人威德力，現此希有相，如俱胝日光，照耀三千界，其中諸惡趣，一切得清淨，如是之神通，母速為我說，天雨眾妙花，遍散於佛刹，復成妙傘蓋，懸覆於空中，十方有異鳥，翔鳴而萃集，男女皆大喜，異常而嚴飾，盲者復瞻見，聾者還聽聞，瘡痂者得語，迷惑得正念，諸醜陋麤惡，變成妙色相，一切不善人，皆發慈悲心，何人行世間，發起神通力，此為最上事，母速為我說。

爾時乳母答寶授童子說伽陀曰

功德寶出現	清淨難思議	清淨最上行
無垢無增減	世尊為眼目	視生如的親
化行於世間	無親疎分別	為現乞食來
不住世間相	不染世間法	如蓮花在水
能斷眾生疑	慈悲常利物	眾生所有苦
唯佛悉能除	稱讚不生喜	譏謗亦不瞋
無障復無礙	行世如清風	來者世間師
最上大法王	善解甚深法	明了第一義
常說中道法	言離於取捨	法句最寂靜
遠離一切處	智積無我相	最上大福聚
善逝世間解	來者無邊相	佛身如須彌
高顯無倫匹	亦如尼俱陀	上下皆相稱
其色如真金	晃耀而璨爛	清淨若玻瓈
又如秋滿月	頭頂圓如蓋	髮鬢而紺青
髻相若螺紋	一一皆右旋	面相如滿月
湛然而清淨	眉間之白毫	右旋而宛轉
兩目如青蓮	光瑩善觀察	唇妙頻婆果
齒白正齊密	舌相如蓮葉	長廣覆面門
鼻高而修直	額廣而平正	兩眉色紺青
延袤及於耳	兩耳極端正	輪朶垂至肩
如來梵音聲	清亮如頻伽	美妙復柔軟
眾生聞者喜	所有緊那羅	孔雀鸚鵡
鳩鵲拘枳羅	拘那羅鴛鴦	囉母多命命
如是等音聲	及彼諸天樂	一切美妙聲
皆不及如來	於十六分中	不及於一分
項細復圓滿	兩臂而臚直	二手指纖長
具輪螺等相	軟如兜羅綿	甲妙赤銅色
胸臆廣平正	臍輪而深密	陰藏若馬王

藏覆而不現 乃至二足下 其色如紅蓮
 平滿復柔軟 具千輻輪紋 及與鈎幢等
 如是諸相備 百福悉裝嚴 具力大丈夫
 一切世間師 常作師子吼 說於不二法
 所出諸言辭 真實無差忒 愛語復柔順
 眾生聞者喜 覺悟諸眾生 應根而啟發
 有義利功德 為最上第一 具如是裝嚴
 名為佛世尊 十方世界中 凡聖無有比

爾時寶授童子得聞乳母說是伽陀讚歎佛
 已即白母言云何令我得見於佛佛知其意
 速往宮門現身而立乳母指言斯即是佛寶
 授童子乃於殿上遙見世尊舉手頂禮即作
 是念若有眾生覩見如來如是具足功德之
 相不發大菩提心者難得己利又復思惟經
 於百千俱胝劫中難遇於佛我今值遇甚為
 希有當捨此身而為供養是時童子手持千
 葉金蓮即於殿上投身而下時彼童子佛力
 所持住於空中捧以金蓮用獻於佛是時金
 蓮離童子手乃於佛上虛空之中變成花蓋
 眾寶嚴飾殊妙第一爾時寶授童子即於空
 中向佛合掌說伽陀曰

我所獻蓮花 不為斷煩惱 及於一切法
 唯為佛菩提 如菩提不生 非有亦非無
 非取亦非捨 我從佛現化 非愚迷所著
 相與無相等 我離一切相 供養佛世尊
 所獲諸功德 亦離一切相 今奉獻此花
 不願證二乘 以彼第一乘 常轉於佛刹
 爾時尊者大目乾連侍佛之右見是事已即
 說伽陀問寶授童子曰 如是釋迦佛

汝信重供養 汝何心顛倒 云菩提不生
 爾時寶授尊者大目乾連說伽陀曰
 諸法本不生 所施空無為 法性本如是
 云何有所生 圓頂被袈裟 住於羅漢相
 如不能知空 佛智何能了 汝若有妄想
 供養俱胝佛 雖供如是佛 實為非供養
 尊者至於今 猶不斷妄想 汝心當云何
 無相稱有相

爾時尊者大目乾連復謂童子曰如來不證
 無上正等正覺耶亦不說法耶寶授童子曰
 夫大智者不住菩提相不住如來相諸法性
 無為法本無有生若如是了知是即知法性
 不驚不怖捨離親疎無來無去無行無相不
 住佛法不住緣覺法不住聲聞法亦不住貪
 法不住瞋法不住癡法乃至不住愚迷眾生
 無明煩惱等法亦復不住有色無色有想無
 想有相無相清淨不清淨及身口意平等不
 平等一切諸法皆無所住

爾時尊者大目乾連又復問言寶授童子如
 來於阿耨多羅三藐三菩提莫有所證耶童
 子言不也若有所證即住如來相住菩提相
 住解脫相若住是相即為愚迷大目乾連言
 童子我亦無相汝謂有相大目乾連又復告
 連一切眾生愚迷虛妄乃生諸根不能調適
 大目乾連言若眾生具足虛妄者法亦虛妄
 若虛妄者汝云何說童子言大目乾連說法
 無相是名說法如是說者無有所至亦無所
 證亦無所知亦無所見大目乾連言童子若

如是者，汝今何故供養如來。童子言：大目乾連，汝若如是見如來相見施者相，時大目乾連聞童子言已，默然而住。

爾時童子又復告言：大目乾連，若復眾生見有是相者，不能解脫，不得已利，遠離如來寂靜涅槃，必當發趣聲聞乘也。

爾時大目乾連說伽陀曰：童子雖年幼，智慧如大海，經於幾多時，學成無生法，爾時寶授童子答大目乾連說伽陀曰：

所學即非學，一切學無性，大智如是學，我學亦如是，汝之所問我，著於眾生相，眾生本無相，諸法不可得，說有菩提相，愚迷非正見，尊者今云何，猶住於諸見，智者於諸見，一切悉清淨，佛法愚迷法，及彼種種法，如是觀皆空，是知諸法性，若住有無相，求證菩提者，法本非有無，菩提云何得，說法無邊際，眾生亦如是，不住差別相，斯即名涅槃，如是行輪迴，師資無所有，此無相法中，智者不迷惑，愚迷言得證，彼皆住輪迴，無明轉增長，是即為魔著，安坐菩提場，為示俗諦故，諸佛之所證，非俗非寂靜，菩提不可說，遠離見非見，若見如是實，彼能解妙法。

爾時尊者舍利弗白佛言：世尊，此寶授童子從於何時於法修行，佛言：舍利弗，我初發阿耨多羅三藐三菩提心時，此寶授童子已證無生法，忍經三百千劫，又舍利弗，我於往昔燃燈佛處得授記時，我初證得無生法，忍寶授童子於彼法中，為大菩薩解空第一，舍利

弗復白佛言：世尊，寶授菩薩何因何緣，經如是時不證阿耨多羅三藐三菩提。

佛告舍利弗：汝將此義自問寶授菩薩，必為汝說。時舍利弗承佛聖旨，即伸問言：寶授菩薩，今云何不成佛耶。寶授菩薩言：尊者，阿耨多羅三藐三菩提不可得故，由是我成佛，舍利弗言：寶授菩薩於意云何。如來成佛莫有相耶。寶授菩薩言：如來若於菩提有所證者，即是取相，若取相者即是妄想，舍利弗言：寶授菩薩，汝從爾來住何忍何行，復以何法化度平等。寶授菩薩言：我於一法而尚不住，何況有四。舍利弗：汝勿謂我有法說耶。證菩提耶。是如來耶。得解脫耶。舍利弗言：希有善男子，若能於法如是了知，汝向於佛宜可出家。爾時寶授菩薩說伽陀曰：

諸有出家者，多著出家相，心妄想迷惑，稱謂有所得，執見於事法，修行布施因，欲求無為果，所證即有為，不了無相地，見有生不生，得與無得相，謂得甘露味，是人於佛法，乃名破法者，如來釋師子，說法寂無相，不住心非心，不住性無性，若見如是說，是即見佛說，若見有相者，斯人眼非淨，我見非解脫，智者不應行，我見即愚迷，執見有常相，以自有相見，謂得於涅槃，不識夢幻性，及背空無相，佛說如是人，是大無智慧，又復調諸根，持戒著禪定，起於妄想心，住相迷求果，此則法中賊，智者應當知，以斯種種法，我出家何益，法界本湛然，諸法無分別。

譬如山響等，智者不見相，當住於如如，無別有性相，若了如是法，何住出家相，爾時妙吉祥菩薩告寶授菩薩言：云何說為菩提。寶授菩薩言：離諸語言名為菩提，妙吉祥言：汝當云何作如是說。寶授菩薩言：法本無言故作是說。

妙吉祥言：為初地菩薩當何所說。令云何學。寶授菩薩言：當如是說，不斷貪慾瞋恚，不捨愚癡，不斷煩惱，乃至五蘊六處等，又復於智慧愚癡不生疑惑，不心念佛不思惟法，不供養眾，亦不持戒，不於朋友而求寂靜，乃至諸難亦不越度。妙吉祥當為初地菩薩說如是法，令如是學於意云何。亦復不應於是諸法而有住相。若住相者是為住法，彼即愚迷起生滅法。若於是法說無疑惑，即於法界知其性也。若能如是了法性者，是得名為說菩提也。妙吉祥若有菩薩聞斯法已，不驚不怖，當知是為得不退轉。

爾時會中有八苾芻，忽聞說此無相正法，心不愛樂，出於法會吐血命終，皆墮阿鼻大地獄中。爾時妙吉祥菩薩白佛言：世尊，云何此八苾芻聞此正法，乃有如是大惡相耶。佛言：妙吉祥，莫作是說。然此苾芻經十千劫，不曾聞法，不近善友，是故今日聞此正法，心不愛樂。妙吉祥，此八苾芻當來之世，於阿鼻獄中，忽思正法，尋便命終，生兜率陀天，為彼天子，或生人間，為轉輪王，經六十八劫，當得承事十那由他佛，於彼劫後有佛出世，號無垢光如來，應供正等正覺，彼無垢光佛如我今日，住廣嚴城廣

為人天說法授記時彼天子天耳遙聞說法授記即與八萬天子同詣佛所到佛所已散眾天花遍廣嚴城供養瞻禮却坐一面白佛言世尊我等隨喜樂聞正法願佛為說菩提之行時無垢光如來為說正法便令發起大菩提心彼諸天子纔發心已應時皆於阿耨多羅三藐三菩提得不退轉是時廣嚴城中有八萬四千人亦於阿耨多羅三藐三菩提得不退轉復有千二百人遠塵離垢得法眼淨爾時世尊告妙吉祥言假使菩薩於百千劫修行六波羅蜜無方便慧不如暫時聞此正法何以故聞此正法功德無量何況愛樂聽受乃至書寫受持讀誦為他廣說妙吉祥若復有人樂求阿羅漢果及樂求辟支佛者於此法中不應修學若樂求阿耨多羅三藐三菩提者當學此法

爾時寶授菩薩知佛世尊及苾芻眾未有食處乃告乳母可於宮中速取食來用施佛僧於是乳母速取百味飲食盛滿一器授與寶授菩薩菩薩得食即於佛前發誓願言如來之所說一切法無盡斯言真實者此食亦無盡乃至苾芻眾悉令得飽足爾時寶授菩薩即以飲食盛滿一鉢奉獻佛已告諸苾芻言尊者慈愍我故各各受食又復告言我所施者不以身施不以心施離於三業不求福果不住有為法不住無為法亦不著世法亦復不住聲聞緣覺及佛菩提時彼苾芻眾無有一人伸鉢受食者寶授菩薩言諸尊者當受此食尊者樂乞我今樂施我

於尊者亦無所求時寶授菩薩復發願言佛語真實如妙吉祥及百千俱胝菩薩當來之世於功德莊嚴王佛刹皆得成佛同一名號若真實者今此器中所有飲食令諸苾芻所持之鉢悉皆充滿此器中食願得無盡以願力故諸苾芻眾各各鉢中自然食滿時寶授菩薩復以器中餘食施廣嚴城中一切人民悉令飽滿器中飲食猶尚不盡

爾時世尊告寶授菩薩曰有五種寶於菩薩行施能令清淨何等為五一者行施無有希望二者於施心無所著三者所施不起於相四者不見施之果報五者不令受者有所還報佛言復有四種寶行施菩薩應常思念何等為四一者常念空三摩地二者常念於佛三者常念大悲四者常念於己不求果報菩薩若如是行施是為淨施

佛告妙吉祥言此寶授菩薩於當來世過三十劫得成阿耨多羅三藐三菩提號不空力稱如來應供正等正覺明行足善逝世間解無上士調御丈夫天人師佛世尊出興於世彼佛眾會有無邊菩薩是諸菩薩皆住不退轉地威力無邊壽亦無量

爾時世尊及大苾芻眾受彼食已還歸本處爾時妙吉祥菩薩白佛言世尊當何名此經我等云何受持佛言此經名為菩提行亦名一切法為首如是受持

佛說此經已寶授菩薩并諸大眾天人阿修羅乾闥婆等聞佛所說皆大歡喜信受奉行寶授菩薩菩提行經

佛說除蓋障菩薩所問經卷第一 No. 489

西天譯經三藏朝散大夫試鴻臚少卿傳梵大師賜紫沙門臣法護等奉詔譯

如是我聞一時佛在象頭山中與大苾芻眾七萬二千人俱皆是阿羅漢諸漏已盡無復煩惱心善解脫慧善解脫如大龍王諸有所作悉已成辦釋諸重擔逮得己利盡諸有結正智妙心俱得解脫諸心自在到勝彼岸善入法界建立法幢心能棄捨一切利養正善出家極善具圓滿足諸願住涅槃道唯一補特伽羅現居學地所謂尊者阿難諸菩薩摩訶薩八萬四千人皆是一生補處獲諸總持得一切智現前趣向一切智漸入一切智增廣一切智得無礙總持諸三摩地復能安住首楞嚴王妙三摩地具大神通遊戲自在履輕安道離諸所起一切障累大慈大悲廣遍十方一切世界超越無邊一切佛刹通達空行及無相行諸願離著勤劬發起一切有情利益勝行善入一切佛之境界心如虛空具無邊智心如大海深無涯底心如須彌山王堅固不動心如蓮華離諸染著心如妙寶極善清淨心如真金精鍊瑩潔其名曰寶星菩薩摩訶薩寶星菩薩摩訶薩寶印手菩薩摩訶薩寶冠菩薩摩訶薩寶髻菩薩摩訶薩寶峯菩薩摩訶薩寶積菩薩摩訶薩寶頂菩薩摩訶薩寶幢菩薩摩訶薩金剛藏菩薩摩訶薩金藏菩薩摩訶薩寶藏菩薩摩訶薩吉祥藏菩薩摩訶薩淨藏菩薩摩訶薩淨無垢藏菩薩摩訶薩如來藏菩薩摩訶薩智藏菩薩摩訶薩日藏菩薩

摩訶薩等持藏菩薩摩訶薩蓮華藏菩薩摩訶薩解脫月菩薩摩訶薩普月菩薩摩訶薩普賢菩薩摩訶薩觀自在菩薩摩訶薩得大勢菩薩摩訶薩普光菩薩摩訶薩普眼菩薩摩訶薩蓮華眼菩薩摩訶薩廣眼菩薩摩訶薩普威儀道菩薩摩訶薩普嚴相菩薩摩訶薩普戒慧菩薩摩訶薩智慧菩薩摩訶薩法慧菩薩摩訶薩勝慧菩薩摩訶薩上慧菩薩摩訶薩金剛慧菩薩摩訶薩最勝慧菩薩摩訶薩師子慧菩薩摩訶薩師子遊戲菩薩摩訶薩大音聲王菩薩摩訶薩師子吼聲菩薩摩訶薩震吼深妙音聲菩薩摩訶薩無染著菩薩摩訶薩離諸垢菩薩摩訶薩月光菩薩摩訶薩日光菩薩摩訶薩智光菩薩摩訶薩智吉祥菩薩摩訶薩賢吉祥菩薩摩訶薩月吉祥菩薩摩訶薩蓮華吉祥菩薩摩訶薩寶吉祥菩薩摩訶薩妙吉祥童真菩薩摩訶薩如是等諸菩薩眾而為上首復有賢護等十大大士慈氏等賢劫中一切菩薩摩訶薩眾四大王天主等四大王天諸天子眾帝釋天主等忉利天中諸天子眾須夜摩天主等夜摩天中諸天子眾兜率陀天主等兜率陀天諸天子眾善變化天主等化樂天中諸天子眾他化自在天主等他化自在天中諸天子眾導師等善分魔王子眾大梵天主等梵眾天中諸天子眾大自在天主等五淨居天諸天子眾毘摩質多羅阿修羅王大阿修羅王羅睺阿修羅王等無數百千阿修羅眾阿那婆達多大龍王摩那斯大龍王娑伽羅大龍

王阿難多大龍王嚩蘇枳大龍王等無數百千龍王之眾吉祥威光龍王子等無數百千龍王之子并諸龍女及餘無數百千龍夜叉乾闥婆阿修羅迦樓羅緊那羅摩睺羅伽人非人等大眾集會時象頭山遍四方面四由旬內天人大眾充滿虛空乃至無有一毛端量極微塵量之所空缺於是等天龍夜叉乾闥婆阿修羅迦樓羅緊那羅摩睺羅伽人非人等眾會中間敷佛所坐妙師子座其座高一由旬縱廣正等各半由旬嚴設無數百千天妙寶衣寶鈴寶網張設幟蓋彌覆其上復有無數百千天妙繒帛周匝垂掛散真珠華及諸妙華又師子座周匝地方皆是金剛所成嚴飾殊妙地如掌柔軟清淨妙香芬馥無數百千天妙寶華散布其地復有蓮華大若車輪無數百千黃金為葉瑠璃為莖帝青為臺馬腦為鬚妙香可愛適悅快樂如是莊嚴佛所受用又復師子之座於其四隅不近不遠有四寶樹而極聳拔高半由旬周廣盤鬱二俱盧舍

爾時世尊在大眾中處師子座以極淨慧轉妙法輪摧伏魔軍不染世法作師子吼明煥無畏猶如大池清淨無雜又如大海廣積妙寶深無涯底如須彌山王高出眾山如日光明威耀赫奕如滿月輪人所愛樂如大龍王能雨法雨如大梵王世間最上而佛世尊與無數百千俱胝那庾多梵王護世等無邊善調伏者弟子眾俱是時大眾一心誠諦瞻仰世尊爾時世尊先以常光照諸大眾於常光中復

從頂上放大光明其名普照是光復有無數百千光明眷屬其光即於十方一切世界普照耀已旋環佛所右繞三匝復從世尊口門而入而佛世尊口門之相悉無動靜譬如日月光明悉從虛空界入而虛空界亦無動靜佛之光明口門入時無動靜相亦復如是又如積以乾沙投之酥油或投以水彼等入時悉無動靜佛之光明口門入時無動靜相亦復如是爾時東方去此佛剎過殑伽沙數等世界有世界名大蓮華其中有佛號蓮華眼如來應供正等正覺明行足善逝世間解無上士調御丈夫天人師佛世尊為諸菩薩宣說法要彼所說法唯以一乘發起利益彼佛剎中無有聲聞緣覺名字況復聲聞緣覺乘法又彼世界有情皆修菩薩行法得不退轉於阿耨多羅三藐三菩提又彼世界不以飲食而為資養彼諸菩薩悉以等持靜慮法喜為食又彼世界不以日月星宿而為照明皆彼如來身光普照而悉清淨又復其土無諸草木沙礫土石山等地平如掌彼有菩薩摩訶薩名除蓋障獨止一處若諸有情聞是菩薩名者一切障累悉得蠲除是時除蓋障菩薩摩訶薩蒙佛光明之所照觸離自所止詣彼佛所到已頭面禮佛雙足退住一面并餘菩薩各各蒙光所照觸已悉離所止咸來詣彼世尊蓮華眼如來所到已頭面各禮佛足退住一面爾時除蓋障菩薩摩訶薩即從座起偏袒右肩右膝著於蓮華臺上合掌頂禮白其佛言世尊何故有是光明極善無垢清淨悅意使

諸有情蒙光照者身心調暢

爾時蓮華眼如來告除蓋障菩薩摩訶薩言善男子西方去此佛刹過菟伽沙數等世界有世界名娑婆其中有佛號釋迦牟尼如來應供正等正覺明行足善逝世間解無上士調御丈夫天人師佛世尊若諸有情聞彼如來名字之者悉得不退轉於阿耨多羅三藐三菩提是彼如來所現此光明即時除蓋障菩薩摩訶薩復白佛言世尊何因何緣而諸有情聞彼如來名字之者悉得不退轉於阿耨多羅三藐三菩提蓮華眼如來告除蓋障菩薩摩訶薩言善男子彼佛如來往昔修行菩薩道時發是願言願我當來成正覺已一切有情聞我名者悉得不退轉於阿耨多羅三藐三菩提除蓋障菩薩言云何世尊彼世界中一切有情悉得不退轉邪佛言不也善男子除蓋障菩薩言云何世尊若然者亦有有情不聞彼佛名邪佛言善男子一切皆聞除蓋障菩薩言若皆聞者何故乃有不得不退轉者佛言善男子所言一切不退轉亦非一切不退轉除蓋障菩薩言如佛所說一切不退轉亦非一切不退轉其義云何佛言善男子若有有情得聞如來名字生起不退轉種子者我說斯等有情得不退轉非是得聞如來名字俱時皆得不退轉地善男子我今復說譬喻以成斯義譬如有樹初植種子而其種子離諸過失後以諸緣得生牙莖乃至滋長果實成結善男子彼樹何故但說種子除蓋障菩薩言世尊由其種子離諸過失乃

至果實成辦故說種子佛言善男子得不退轉有情亦復如是。由彼纔聞如來名字之時不退轉種子生起具足。而其有情即於阿耨多羅三藐三菩提得不退轉。

爾時除蓋障菩薩摩訶薩白蓮華眼如來言世尊我今欲往娑婆世界瞻觀世尊釋迦牟尼如來應供正等正覺禮奉親近尊重供養。於是蓮華眼如來告除蓋障菩薩言善男子汝當可往今正是時。餘諸菩薩俱白蓮華眼如來言世尊我等亦欲往詣娑婆世界瞻觀世尊釋迦牟尼如來應供正等正覺禮奉親近尊重供養時彼世尊告諸菩薩言善男子汝等可往今正是時。然汝往彼世界勿生放逸。何以故彼世界中諸有情類極貪瞋癡無沙門婆羅門父母之想。非法欲行暴惡麤獷。口出惡言。高倨輕慢。染著懈怠。破戒造惡。慳嫉增盛。如是多種煩惱隨煩惱等。彼佛世尊於如是等惡有情中而為說法。彼諸菩薩白其佛言世尊彼佛如來難行能行。於如是等惡有情中能為說法。佛言諸善男子如是如是。彼佛如來難行能行。惡有情中能為說法。又善男子。彼諸有情亦復如是。難行能行。於彼雜染世界之中。能起一善心者。斯為極難。何以故。若清淨世界中。清淨有情發起善心。豈為希有。雜染世界之中。能起善行者。極為希有。能於一彈指頃發淨信心。一彈指頃能歸依佛及法僧寶。一彈指頃修持淨戒。一彈指頃離貪著心。一彈指頃起悲愍意。發阿耨多羅三藐三菩提心。極為希有。諸菩薩言希有世界。希有善逝。

爾時除蓋障菩薩摩訶薩等諸菩薩眾咸歎善哉。於彼佛所如其行相。聞佛所言。順佛教勅。各各頭面禮佛足。已從佛會出。俱時往詣娑婆世界。於世尊釋迦牟尼佛所作供養事。或有化現諸寶樹者。枝幹臚圓。色相榮茂。華果具足。或現琉璃寶樹。或現頗胝迦樹。或現劫樹。或真金樹。或眾華樹。或眾果樹。或現妙寶衣雲。或莊嚴雲。或塗香雲。或寶鬘雲。或妙蓋雲。或末香雲。或鼓樂雲。如其所應。各化現已。咸悉萃集前導。除蓋障菩薩摩訶薩等諸菩薩眾。來詣娑婆世界。

爾時除蓋障菩薩摩訶薩告諸菩薩言。仁者。彼娑婆世界諸有情等。苦之深重。仁等宜應隨其神力。善化而往。使彼有情得勝妙樂。時諸菩薩聞是語。已如教而行。

爾時除蓋障菩薩摩訶薩如其色相。以自神力。作諸化事。即從身中放大光明。善妙無垢。清淨適悅。使諸有情蒙光照者。身心調暢。是光普遍。廣照於此三千大千世界。而此三千大千世界之中。所有地獄。餓鬼。畜生等趣。諸有情類。蒙光照觸。皆得離苦。息患。害心。互相皆起父母之想。又此三千大千世界之中。幽冥暗暝。日月光明。所不照處。是光普照。所有日月具大神力。有大威德。自在照耀。為此光明映蔽不現。悉無焰赫光耀之用。又此三千大千世界。光明普照。其中所生諸有情類。互得相見。又此三千大千世界。諸鐵圍山。大鐵圍山。目真隣陀山。摩訶目真隣陀山。寶山。黑山。及諸山等。其光普照。上至梵世。下至阿鼻大地。

獄於其中間一切方分，而無光明所不照處。爾時諸菩薩眾，隨彼色相如其所應，亦以神力作諸化事，令諸有情須食者得食，須飲者得飲，須衣者得衣，須輦者得輦，須財者得財，盲者能視，聾者能聽，裸者得覆，迷亂者還得正念，苦者得樂，諸懷妊者產生無難。佛說除蓋障菩薩所問經卷第一

佛說除蓋障菩薩所問經卷第二

西天譯經三藏朝散大夫試鴻臚少卿傳
梵大師賜紫沙門臣法護等奉 詔譯

爾時除蓋障菩薩摩訶薩等菩薩眾，來詣於此象頭之山，去山不遠，彼諸大士俱時化現殊妙寶網，遍覆三千大千世界，又於空中雨眾天華及天果雲、天寶鬘雲、天塗香雲、天衣服雲、天末香雲，及天上服寶蓋幢幡諸供具雲，廣大化現，隨所現已，而諸有情皆得瞻覩，悉能獲得最上快樂。彼象頭山所有樹林，即時自然離其地方，別現種種微妙寶樹、劫樹、華樹、果樹、栴檀香樹、沈水香樹，彼等皆是神力所化，又於空中自然出妙天鼓音聲，於鼓音中說伽陀曰：

龍彌尼園最勝生 不以煩惱種等比
稽首無等如虛空 故我來此最勝山
坐勝道樹成菩提 警覺摧伏魔力軍
稽首持勝無垢光 故我來此最勝山
如幻如焰如水月 此等理法悉覺了
稽首最上大福樹 故我來此最勝山
覺了世法如戲劇 巧現眾法如帝弓

稽首無動勝福藏 故我來此最勝山
久遠歷於多百劫 為欲圓滿悲心故
稽首無垢月面尊 故我來此最勝山
多百俱胝菩薩眾 諸天供養亦復然
稽首已離癡暗暝 故我來此最勝山
已得最上聖法藏 悲所成身棄世財
稽首無等作大利 故我來此最勝山
住寂靜心常慈意 如蓮在水離諸染
稽首勝上持功德 故我來此最勝山
妙相開華清淨身 隨形眾好世資養
稽首寶樹無邊枝 來此供養願攝受

其鼓音中說是伽陀已，尊者大目乾連即從座起，偏袒右肩，右膝著地，合掌向佛而白佛言：世尊，何故今時現是瑞相，昔所未聞，昔所未見，佛告尊者大目乾連言：東方去此佛剎，過菟伽沙數等世界，有世界名大蓮華，彼佛世尊號蓮華眼如來，應供正等正覺，現住說法教化利益，彼佛剎中有菩薩摩訶薩名除蓋障，與彼無數俱胝那庾多百千菩薩大士，同來詣此娑婆世界，彼眾將至，故先現瑞，說是語已，除蓋障菩薩摩訶薩與無數俱胝那庾多百千菩薩之所圍繞，各以廣大神通威力，來詣佛所，到已，頭面各禮佛足，時除蓋障菩薩摩訶薩說伽陀曰：

具大名稱大勝慧 得大無畏大牟尼
已度生死險難中 稽首出過煩惱岸
汝為普遍熾焰光 汝為普遍大燈炬
汝得一切解脫門 稽首歸命無等等
堅固不動如山王 深廣無底如大海

一切邪外不能破 稽首稱讚大法王
本來寂靜法無生 自性如是常寂滅
我法聖尊善開明 稽首轉大法輪者
或有宣說諸正道 或說趣入真實理
或說涅槃正妙門 或說授記成覺果
有情心意汝悉知 是中無少不知者
有情觀汝法行圓 是故隨奉汝教勅
所有貪瞋癡三毒 及餘種種垢染等
坐道樹成正覺尊 以大智火悉焚爇
汝自得度度有情 汝自解脫利世間
汝於世間善所求 永破生死諸險難
無智久沈於睡眠 有情流轉生死輪
善為開覺汝聖尊 稽首等視如親愛
汝觀此諸大士眾 一切安住菩提道
皆欲聽聞妙法門 唯願世尊隨為說

爾時除蓋障菩薩摩訶薩說是伽陀讚歎佛已，時佛勅令處蓮華臺一面而坐，餘諸菩薩大眾，佛亦勅令隨其所應，處蓮華臺一面而坐。爾時除蓋障菩薩摩訶薩從座而起，偏袒右肩，右膝著於蓮華臺上，合掌向佛而白佛言：世尊，我今欲問如來應供正等正覺，若佛世尊垂見聽者，我當發問，願為宣說，佛告除蓋障菩薩摩訶薩言：大士，恣汝所問，斯為常事，諸佛如來亦悉聽許，隨其所疑，如來為汝一一宣說。爾時除蓋障菩薩摩訶薩承佛聖旨，即白佛言：世尊，諸菩薩摩訶薩云何修行，即得布施具足，復云何得持戒具足，云何得忍辱具足，云何得精進具足，云何得禪定具足，云何得慧具足，云何得方便具足，云何得願具足，云

何得力具足。云何得智具足。云何得菩薩如地。云何得如水。云何得如火。云何得如風。云何得如虛空。云何得如月。云何得如日。云何得如師子。云何調伏。云何了知。云何得如蓮華。云何得廣大心。云何得清淨心。云何得無疑惑心。云何得如海智。云何得微妙智。云何得智辯才。云何得解脫辯才。云何得清淨辯才。云何得一切有情歡喜辯才。云何得信順語。云何得正法語。云何得隨法行。云何善入法界。云何住空境界。云何得無相行。云何得諸願離著。云何得慈身。云何得悲身。云何得喜行。云何得捨行。云何得神通遊戲。云何得離八難。云何得不捨善知識。云何得宿命智。云何得不捨善知識。云何得常離惡知識。云何獲得如來法性之身。云何獲得金剛真實之身。云何得大導師。云何得善知諸道。云何善說無顛倒道。云何得常安住妙等引心。云何著糞掃衣。云何持三衣。云何常坐不臥。云何常乞食。云何一坐食。云何食後不飲漿。云何受阿蘭若法。云何樹下坐。云何空地坐。云何死屍間住。云何節量食。云何隨敷座。云何得相應行。云何持經。云何持律。云何持論。云何於軌範所行及威儀道而得具足。云何得離慳嫉二法。云何於一切有情起平等心。云何於佛如來善作供養承事。云何能摧伏諸慢。云何能廣多淨信。云何善知世俗。云何善了勝義。云何善知諸緣生法。云何知自。云何知他。云何能於清淨佛土中生。云何能離胎藏垢染中生。云何能得捨家出家。云何能

得淨命自資。云何能得心無懈倦。云何得受諸佛教勅。云何獲得熙怡面相。云何得離鬻鬻之相。云何得多聞。云何得正法攝受。云何得法王子。云何能得勝出梵王帝釋護世天等。云何能知有情心意。云何能知成熟有情。諸有法式。云何能成智者。云何能得常處妙樂。云何善知四攝之法。云何獲得妙相具足。云何得為他所依止。云何得如大妙藥樹。云何乃能勤修福行。云何善了諸變化事。云何速能證得阿耨多羅三藐三菩提果。

爾時世尊讚除蓋障菩薩摩訶薩言。善哉善哉。善男子。如汝所問。斯為極善。悲愍世間。能令天人大眾獲善利樂。能問如來如是等義。汝今諦聽。極善作意。當為汝說。於是除蓋障菩薩摩訶薩受教而聽。佛言。善男子。菩薩若行十種施法。即得布施具足。何等為十。一者法施。二者無畏施。三者財施。四者不求饒益果施。五者悲愍施。六者不輕慢施。七者恭敬施。八者供養承事施。九者無所著施。十者清淨施。善男子。云何法施。謂若菩薩不以財利心。自所受法。即於他人隨應教授。不以希欲利養恭敬因故。不望他人所知識故。不求名稱故。不以餘事因故。但自思惟。何等有情受諸苦惱。我為蠲除。即以是法。亦復不懷希求之心。無二平等。為他宣說。若復為王及與王臣之所宣說。或為旃陀羅及旃陀羅子說法。亦然。何況餘諸人眾。而菩薩行是法。施時不起高心。善男子。如是名為菩薩法施。云何是無畏施。謂若菩薩自所嫌棄。刀杖等器。亦復

教示他人令棄。於彼一切有情。起如父想如母想。如子想。如眷屬想。及餘親愛知友之想。何以故。菩薩作是思惟。如佛所說。彼彼生中一切轉易。於諸有情聚中。未曾有不是父母及子。并餘親愛知友。乃至於彼微細情命之中。皆為發起利益。設自身肉尚亦與之。何況餘諸大有情類。善男子。如是名為菩薩無畏施。云何是財施。謂若菩薩。或見有情造極不善業。即時以財攝彼有情。由財攝已。是故令其於不善業而悉除斷。於諸善業使彼安住。菩薩作是思惟。如佛所說。布施是菩薩菩提。菩薩所行布施。除斷三種不善之法。一嫉。二慳。三貪。是故我於如來所受布施之法。彼所布施而無高心。善男子。如是名為菩薩財施。云何是不求饒益果施。謂若菩薩所行布施。不以希欲為因。不以財利為因。不以眷屬為因。不以世間近事為因。菩薩修持布施法爾。如是彼因彼緣所行布施。遠離一切饒益果報。善男子。如是名為菩薩不求饒益果施。云何是悲愍施。謂若菩薩見諸有情受諸苦惱。或飢渴者。或裸露者。或穢污殘缺之者。無主無救無歸無依之者。無福者等。菩薩見已。生悲愍心。我為此等有情故。發阿耨多羅三藐三菩提心。念此無主無救無依歸等諸有情類。流轉生死。而我今當以何方。為此有情為主。救與作依歸。作是念時。菩薩由此悲心所逼。即以方便隨為攝受。菩薩攝受彼等有情。俱時所起善根。而無高心。善男子。如是名為菩薩悲愍施。云何是不輕慢施。謂若菩薩行布

施時不以輕重分別故施。不以慢心故施。不以毀謗故施。亦不令他勞力故施。不恃豪富驕恣故施。不希名稱故施。不恃多聞倨慢故施。菩薩若行施時。心必恭敬尊重。專注供養親奉施之善男子。如是名為菩薩不輕慢施。云何是恭敬施。謂若菩薩於軌範師親教師及餘所應尊重之者。修梵行者。身極恭順心極尊重。由恭順尊重故發言慰安。合掌頂禮稽首承迎。於其有情。即以彼彼善相應事而普及之。善男子。如是名為菩薩恭敬施。云何是供養承事施。謂若菩薩或作佛事。或法僧事。若於如來塔像之所。或掃去塵穢。或嚴飾清淨。或以妙香華及塗香等而為供養。又或修治如來故壞塔廟。是為佛事。何名作法事。所謂隨聞何等法門。即當受持書寫讀誦思惟修習。及為他解說。或以無顛倒相應修學。是為法事。何名作僧事。謂以衣服飲食坐臥之具。病緣醫藥奉施眾僧。乃至但以少分清冷之水而為供施。是為僧事。善男子。如是名為菩薩供養承事施。云何是無所著施。謂若菩薩行布施時。起如是心。我今所行布施。不求天報。或天之餘。不求王報。或王之餘。善男子。如是名為菩薩無所著施。云何是清淨施。謂若菩薩隨其所說布施之法。即起伺察。如其彼彼起伺察時。於布施法伺察得無過失。無垢染無障礙邪。善男子。如是名為菩薩清淨施。菩薩若能修此十法者。即得布施具足。又善男子。菩薩若修十種戒法者。當得持戒具足。何等為十。一者別解脫戒行。二者菩薩

攝律儀戒行。三者離諸煩惱燒然戒行。四者離不深固作意戒行。五者怖業戒行。六者怖罪戒行。七者怖非所取戒行。八者堅固志意戒行。九者無依著戒行。十者三輪清淨戒行。善男子。云何是別解脫戒行。謂若菩薩於諸如來所有經中。或戒律中及餘學句所宣示處。如善作意尊重大師所說。於一一法中如理修學。不愛著氏族。不愛著所見。不愛著眾會。無我人過失。於彼學句中而生尊重。善男子。如是名為菩薩別解脫戒行。云何是攝律儀戒行。謂若菩薩作是伺察。我於別解脫戒中。不能取證阿耨多羅三藐三菩提果。謂若如來於一一經中。宣示菩薩所行。及菩薩學句。我當於彼如理修學。何等是菩薩所行。所謂菩薩無非處。非方非時。所行無非時。所說無不知時。無不知方。無不知量。何以故。或有有情於如來所生不信心。為令彼等生信解故。及彼有情隨為攝護故。菩薩自能圓滿菩提勝行。善具威儀柔軟容緩。不雜闍闍趣寂止門。極清淨門。此是菩薩所行。何等是菩薩學句。謂若如來於一一經中。宣示菩薩所學之法。菩薩於中而生信順。不生障礙。此是菩薩學句。善男子。如是名為菩薩攝律儀戒行。

佛說除蓋障菩薩所問經卷第二

西天譯經三藏朝散大夫試鴻臚少卿傳
梵大師賜紫沙門臣法護等奉 詔譯

復次善男子。云何是離諸煩惱燒然戒行。謂

若菩薩或貪火燒然。或瞋火燒然。或癡火燒然。或餘煩惱之火燒然。或餘諸受用侵害火燒然。若欲不燒然者。當起貪之對治。及應遠離貪所起緣。何謂貪之對治。即不淨觀。是貪對治。不淨觀者。謂自身中諸不淨物。髮毛爪齒。涎淚涕唾。淡廕垢汗。大小便利。皮膚血肉。骨髓脂肪。腦膜筋脈。脾腎心肺。肝膽腸胃。胞及肚臑。凡如是等諸不淨物。菩薩應當作此觀想。起是思惟。世間所有彼愚癡者。不明解者。造不善者。尚能了知諸如是等不淨物。已不處貪心。況智者乎。此為菩薩多種不淨之觀。是貪對治。何者是貪所起緣。謂著諸欲染。或見女人端嚴妙色。起可愛心。而生希取。爾時見已。當作是觀。如佛所說夢境無實。何故智者。於此如夢境界之中而起貪心。是名菩薩遠離貪所起緣。何謂菩薩瞋之對治。及遠離彼瞋所起緣。所謂菩薩於諸有情所多起慈心。以此慈心及此因緣。而彼忿恚瞋怒。有情心意皆能攝伏。瞋恚因緣悉得遠離。是名菩薩瞋之對治。及遠離彼瞋所起緣。當作如是觀察之時。即離癡法。離癡由故。彼諸所欲及諸受用。不為侵害之火燒然。此等是為菩薩離諸煩惱燒然戒行。云何是離不深固作意戒行。謂若菩薩獨處一方寂靜而住。不起是心。我不雜亂所行。我寂靜住。我復能行如來法律。餘諸沙門或婆羅門。彼等皆是雜亂所行。多諸闍闍。而悉墜失。如來法律。若能不起如是心者。是為菩薩離不深固作意戒行。云何是菩薩攝善法戒行。謂若菩薩作是伺

察如佛所說諸苾芻應當尊敬修福尊敬護戒尊敬修慧何以故尊敬福者福是現受可愛精光悅意果報如是信者而能遠離諸不善業是為菩薩攝善法戒行云何是怖罪戒行謂若菩薩或有如微塵罪見悉生怖不順所作乃至少罪亦不生輕作是思惟如佛所說諸苾芻譬如有人中於少毒亦趣命終若中多毒亦趣命終諸有罪者若少若多皆墮惡趣若作如是伺察之時菩薩於罪乃生恐怖是為菩薩怖罪戒行云何是怖非所取戒行謂若菩薩或有具信沙門婆羅門及餘人眾信菩薩故或以金銀摩尼真珠珊瑚瑠璃螺貝珍寶財物及餘受用之具於菩薩所囑累寄託雖或單己而菩薩心不起貪著輒生希取又復於諸塔寺之物及眾僧物設使人勸令掌執菩薩於中亦不希取為自資養作是思惟如佛所說菩薩寧自割其身肉而噉食之終不以他不與不許若飲若食及餘物等而懷希取是為菩薩怖非所取戒行云何是堅固志意戒行謂若菩薩或為魔王或諸魔眾及餘天等或現女相或以餘緣來作魔事之所憐惱欲破壞時而菩薩不動不搖亦無減失是為菩薩堅固志意戒行云何是無依著戒行謂若菩薩持戒行時不起是念我所持戒為求天報或天之餘為求王報或王之餘是為菩薩無依著戒行云何是三輪清淨戒行謂若菩薩身業清淨語業清淨意業清淨身業清淨者謂遠離身三不善業一殺生二偷盜三邪染如是名為身不善業語

業清淨者謂遠離語四不善業一妄言二兩舌三惡口四綺語是名語不善業意業清淨者謂遠離意三不善業一貪二瞋三邪見是名意不善業由能遠離諸不善業是故即得三輪清淨是為菩薩三輪清淨戒行善男子菩薩若行如是十法即得戒行具足善男子菩薩若修十種法者即得忍辱具足何等為十一者安受苦忍二者外忍三者諦察法忍四者佛許可忍五者無定方忍六者無差別忍七者不以事因故忍八者耐怨害忍九者悲心忍十者願力救拔忍善男子云何是安受苦忍謂若菩薩或自心有憂悲苦惱隨生起時菩薩安然悉能忍受不起瞋心是為菩薩安受苦忍云何是外忍謂若菩薩親聞他人所出惡言或展轉聞因其毀謗父母師長親友知識或有惡言謗佛法僧菩薩聞已不生瞋恨是中安然悉能忍受是為菩薩外忍云何是諦察法忍謂若菩薩若聞如來所說最極甚深經中有法能斷輪迴種子脫諸結縛壞相續者謂一切法本來寂靜及一切法自性涅槃菩薩得聞如是法已不生驚怖作是思惟若不了知此法及不得此法者豈能證得阿耨多羅三藐三菩提果邪由此因緣故應於如是甚深法中受持思惟修習伺察及生勝解是為菩薩諦察法忍云何是佛許可忍謂若菩薩設起忿恚瞋害心已即當伺察此恚害心從何所起復何處滅何因故生復復何住作是觀時都不見有恚害之法若生若滅二法可得隨生即滅若因若緣亦不

可得以是緣故菩薩於中安然忍受無復生起佛所許可是為菩薩佛許可忍云何是無定方忍謂若菩薩非於晝分能忍夜不能忍或夜能忍晝不能忍自國能忍他國不能忍或他國能忍自國不能忍慣習者能忍不慣習者不能忍菩薩不然於一切國一切處一切時一切種皆悉能忍是為菩薩無定方忍云何是無差別忍謂若菩薩不於己之父母師長眷屬親友知識等處能忍餘諸人所不能忍何以故菩薩乃至於旃陀羅眷屬等處有所侵惱而悉能忍是為菩薩無差別忍云何是不以事因故忍謂若菩薩所起忍行不以財利因故不以怖畏故不為資養故不以世間近事故不為隱覆慚恥等故忍何以故菩薩常行忍辱心故是為菩薩不以事因故忍云何是耐怨害忍謂若菩薩或無他緣來加其惡菩薩爾時即無所忍或時怨對若執刀杖若復持拳起瞋怒心而來打擊或復期剋惡語罵詈菩薩見如是等他怨對來打擊罵詈之時堅固其心深自伏忍作是思惟此等怨對皆是我之自業所感業成熟已來相逼惱誠非父母眷屬親友所造皆是自業造作所成熟故而非外大地界水界火界風界之所成熟又亦非內四大成熟菩薩作是思惟時由此因緣故於有怨害及無怨害平等其心皆悉能忍受是為菩薩耐怨害忍云何是悲心忍謂若菩薩設得王位或為臣佐大富自在威德特尊見諸有情多苦惱者而彼有情於其王所生忿恚心而來毀罵及諸